

Aleksandër MEKSI - Pirro THOMO

ARKITEKTURA PASBIZANTINE NË SHQIPËRI (BAZILIKAT)

Në tërësinë e ndërtimeve të kultit të krishterë të periudhës së pushtimit turk, bazilikat përbëjnë një grup të rëndësishëm për shtrirjen e tyre territoriale, zgjidhjen arkitektonike dhe përmasat.¹⁾ Edhe për tipat e tjerë të kësaj arkitekture është karakteristike prirja për një zgjatje të aksit gjatësor, për një lidhje më të mirë hapsirore të vëllimeve në brendësi të ndërtesës si dhe për një trajtim të pamjes së tyre të jashtme. Por këto prirje arrijnë zhvillimin e tyre më të plotë pikërisht në kishat me ndërtim bazilikal, që me variantet e tyre të ndryshme hasen në Shqipërinë e Mesme dhe Jugore kryesisht gjatë shekujve XVII-XVIII dhe fillimit të shekullit XIX. Pjesa më e madhe e tyre shquhet për përmasat dhe arritjen arkitekturore. Këto kisha janë kryesisht katedralet qytetesh, kisha fshatrash të mëdhenj dhe në disa raste e kisha manastiresh.

Duke vështuar ndërtimin planimetriko-vëllimor të tyre dallojmë tre nëngrupe: bazilikat me kupolë, bazilikat e mbuluara me sistem qemeresh dhe kësulash sferike dhe bazilikat me tavan të rrafshtë.

1. BAZILIKAT ME KUPOLË

Ky nëngrup dallohet nga kishat me strukturë në formë kryqi me kupolë për numrin më të madh se katër të mbështetjeve të kolonave që i jep një aks të ndjeshëm gjatësor godinës dhe një ndarje të qartë në tre nefe nga të cilët qëndrori më i lartë dhe më

i gjerë se anësorët. Karakteristikë e këtij nëngrupi është kupola mbi një tambur të lartë që ngrihet në nefin qëndror. Zakonisht nafi qëndror mbulohet me qemer cilindrik me formuese lindje perëndim. Në disa nga monumentet që ruhen, mbulesa e nefeve anësorë është me qemere cilindrikë me prerje çerek rrethi, në të tjerë me prerje gjysëm rrethi dhe që shkojnë pa ndërprerje në tërë gjatësinë e nefit duke i dhënë godinës një formë të qartë bazilikale, si në brendësi ashtu dhe në anën e jashtme, duke u ndërprerë kjo vetëm nga kupola mbi tambur. Jo në të gjitha rastet brendësia i përmbahet këtij ndërtimi të mirëfilltë bazilikal. Në disa prej tyre në nefin qëndror mbi kolonat kalojnë harqe tërthor, brinjë qëndrueshmërie, ndërsa nefet anësorë mbulohen me qemere që hapen ndaj nefit qëndror.

Kisha e Shën Mërisë në Vrahogoranxi të Gjirokastrës, pikturuar në vitin 1622 nga Onufër Kiprioti,²⁾ përbëhet nga naosi me ambientin e altarit të cilëve më vonë u është shtuar një narteks. Pjesa e vjetër e kishës ka në brendësi gjashtë kolona prej rrotullash guri të lidhura me llaç e kapitële guri. Mbi to kalojnë dy harkada, të cilat e ndajnë kishën në tre nefe. Në katër kolonat më nga lindja nëpërmjet një sistemi harqesh mbajtëse ngrihet tamburi me kupolën. Të katër kolonat janë vendosur në kulmet e një katërkëndëshi kënddrejtë. Për këtë arsye, që të formojnë bazën katrore për tamburin cilindrik janë përdorur dy harqe pranë kolonave veriore e atyre jugore, në nivelin e harqeve mbajtës perëndimor.

1. Ky shkrim është vijim i dy artikujve të mëparshëm që trajtojnë kishat njënefshe dhe ato me strukturë kryqi me kupolë, të botuara në «Monumentet» 19 dhe 20 të vitit 1980. Mbishkrimet janë marrë nga Mbishkrimet e kishave të Shqipërisë (Dorëshkrim, Arkivi i Institutit të Historisë).

2. Dh. Dharmo, Piktura e Onufër Kipriotit në Kishën e Vllaho-Goranxisë, Studime Historike, Nr. 1, 1978, f. 129-142.

e lindor, në fillimet e të cilave edhe mbështeten. Krahu perëndimor i nefit qendror, më i gjeri nga të tre nefet, mbulohet me qemer cilindrik të vazhduar, po kështu edhe pjesa ndërmjet tamburit dhe absidës. Nefet anësorë, të vazhdueshëm që nga muri lindor deri tek ai perëndimor, mbulohen me qemer cilindrik me prerje çerek rrethi. Naosi ndriçohet nga tre dritare të ngushta e të larta që vijnë e zgjerohen në pjesën e brendshme duke marrë formë drejt-këndëshe. Hyrja për në naos është në murin perëndimor.

Ambienti i altarit ndahet nga naosi nëpërmjet ikonostasit të vendosur te dy kolonat më nga lindja. Nga ana lindore është edhe absida gjysëm rrethore si në brendësi ashtu edhe në anën e jashtme. Ajo ndriçohet nga një dritare e ngushtë e vendosur me një shmangje drejt jugut. Pjesa gjysëm rrethore nuk fillon në rrafshin e murit lindor por pak më brenda duke patur një shkallëzim mbuluar me hark. Ambienti i altarit ndriçohet edhe nga një dritare në anën jugore.

Narteksi është shtuar në një kohë të dytë, për këtë flasin fugat në takimin me naosin. Ai mbulohet me strukturë qemeresh si të naosit. Ai ndahet në tre pjesë nga dy harqe që shkojnë nga muri perëndimor i naosit në pilastrat në murin perëndimor të nartekstit. Nga një kolonë është vënë më vonë si përforcim nën kyçet e këtyre harqeve. Pjesët anësore të narteksit mbulohen me qemere cilindrikë me pamje çerek rrethi dhe formuese lindje perëndim. Narteksi ndriçohet nga një dritare e vogël në anën jugore, pranë së cilës ka një kamare.

Në anën e jashtme kisha ka një trajtim të thekshtë, me mure të rrafshta me gurë gëlqerorë e shtu fi lidhur me llaç gëlqereje. Ajo mbulohet me çati dyujëse me rrasa guri. Në qendër të saj dalin tamburi cilindrik dhe pjesë të vogla si frontone që i takojnë harqeve mbajtës verior dhe jugor, që përbëjnë në këtë rast bazamentin e tamburit. Tamburi është relativisht i lartë, ai ka katër dritare e katër nike që këmbehen me njëra tjetrën. Ato janë të shkallëzuara dhe mbulohen me harqe tullash. Po me tulla është dhe një shirit dhëmbësh sharre dhe korniza, elemente zbukurimi të marrë nga kisha e Labovës së Kryqit që ndodhet pranë.

Kisha e Shën Thanasit të Mazharit në Poliçan të Gjirokastrës, ka mjaft ngjashmëri me kishën e mësipërme. Kisha përbëhet nga naosi dhe ambienti i altarit. Në brendësi të kishës kemi dy pilastra dhe dy kolona. Mbi to dhe në pilastrat në muret lindorë dhe perëndimorë kalojnë harkada treshe që e ndajnë kishën në mënyrë të qartë në tre nefe dhe i japin asaj ndërtimin hapsiror të bazilikës. Nefi qendror që është dhe më i gjerë mbulohet me qemer

cilindrik me formuese lindje perëndim. Nefet anësorë sot janë të mbuluar me çati me strukturë të drunjtë, ndërsa dikur mbuloheshin me qemer cilindrik me prerje çerek rrethi, gjurmët e të cilit ruhen në thembrat e qemerit në muret anësorë. Mbi kolonat dhe pilastrat ngrihet tamburi i lartë me kupolën. Tamburi ngrihet mbi harqet mbajtës dhe qemeret e nefit qendror në mënyrë të rregullt, me trekëndsha thujse sferikë, dëshmi kjo e një aftësie të kufizuar të ndërtuesve. Në anën e jashtme mbi çatinë dyujëse në dy nivele (më lart ajo e nefit qendror) mbuluar me rrasa guri del bazamenti katror i tamburit, muret jugor e verior të të cilit kanë në dukje harqe të verbër. Tamburi cilindrik ndriçohet me katër dritare dyshe që kanë nga një kolonë guri çmërsi të rrumbullakosur në anët e ngushta dhe një kapitël mbi të.

Ambienti i altarit ndahet sot nga naosi vetëm nëpërmjet një muri shtesë nga pilastrat në murin jugor. Për këtë gjë bindemi nga gjurmët e një harku të vonë që krijonte një hapsirë sot të murosur. Në anën lindore është absida gjysëm rrethore që ka për ndriçim një dritare dyshe si të tamburit. Në anën më nga jugu kemi një pilastër në mur për absidën veriore dhe dy nike rrethore për protezisin. Edhe te ky monument kemi përdorimin e një shkallëzimi të mbuluar me hark në fillimin e absidës, të cilin e takuam dhe në kishën e Vrahogoranisë.

Në kishë hyhet nga porta perëndimore sot e murosur dhe me një nike mbi të si dhe nga porta jugore që paraprihet nga një portik.

Kisha e manastirit të Shën Mërisë së Krimarovës në Piqeras të Sarandës, ndërtuar në vitin 1672 ngrihet në një kodër mbi fshatin. Kisha është ndërtuar në mes të manastirit duke pasur konakët nga ana veriore dhe perëndimore. Kisha përbëhet nga narteksi dykatësh në anën perëndimore, naosi dhe ambienti i altarit. Narteksi lidhet me naosin nga porta perëndimore e tij. Në katin e dytë hyhet nga një shkallë e jashtme që shërben dhe për konakët, që edhe pse pjesërisht të rrënuar shihet qartë se janë të vonë. Naosi ka gjithashtu dhe një portë në anën jugore mbuluar me arkitra të rrafshhtë, në një kamare mbi të cilën lexohet data e ndërtimit të kishës. Në brendësi janë gjashtë kolona, prej rrotullash guri të lidhura me llaç dhe të suvatuara për t'u dukur një cope. Nefi qendror që është dhe më i gjerë dhe në nivel më të lartë mbulohet me qemer cilindrikë, me formuese lindje perëndim. Nefet anësorë mbulohen me qemere cilindrikë, të veçantë për çdo hapsirë ndërmjet kolonave, dhe që hapen ndaj nefit qendror. Për këtë ata ngrihen mbi harqe të vegjël të ulët që nga kolonat shkojnë në muret anësorë. Kjo veçanti takohet në

një sërë kishash të Bregut të Detit si në Kakome e Krorëz³⁾ dhe Lukovë. Mbi katër kolonat më nga li-
ndja ngrihet me trekëndsha sferikë dhe pas një
kornize tamburi me kupolën.

Si pjesa më e madhe e kishave të manastireve
monumenti është me tre absida. Nën suvanë e re
dallohët që ato janë pesë faqëshe të ndërtuara si
të gjitha kishat me gurë gëlqerorë në rreshta me
tendencë horizontaliteti lidhur me llaç gëlqereje.
Kornizat e absidës janë me rrasa guri të nxjerra
pak nga muri.

Ambienti i altarit në të cilin hipet me një kë-
mbë shkallë ndahet nga naosi me një ikonostas të
drunjtë pa vlera të veçanta. Në anën lindore të tij
është absida rrethore dhe në veri një nike për pro-
tezis.

Në anën e jashtme kisha shquan për trajtimin
e rrafshtë të mureve që ndërpriten nga absidat dhe
kornizat me tulla, sot të suvatuara. Kisha mbulohet
me çati dyjësë mbi të cilën ngrihet mbi një baza-
ment të ulët tamburi që nën suva mund të jetë dhe
tetëfaqësh. Në të janë katër dritare të ngushta. Pas
prerjes së tirandave për të përballuar shtytjet e qe-
mereve, në muret verior e jugor janë vendosur për-
katësisht dy dhe tre kundërforca.

Kisha e Shën e Premtes në Lukovë të Sarandës
është një shembull tjetër i bazilikave me kupolë të
Bregut të Detit. Kisha përbëhet nga naosi dhe am-
bienti i altarit. Në të hyhet nga dy dyer në anët ju-
gore e perëndimore. Në brendësi kemi gjashtë kolo-
na, nëpërmjet të cilave kisha ndahet në tre nefe.
Mbi kolonat në drejtimin veri-jug kalojnë harqe, më
të ulët ata të nefeve anësore më të lartë të nefit
qendror që shërbejnë si brinjë qëndrueshmërie për
mbulesën e nefit qendror me qemer cilindrik me
formuese lindje perëndim. Nefet anësorë mbulohen
me qemere cilindrikë që hapen drejt nefit qendror
dhe që ngrihen mbi harqet e ulët nga kolonat te
muret. Mbi katër kolonat më nga lindja nëpërmjet
trekëndshave sferikë ngrihet tamburi me kupolën.
Në tamburin tetëfaqësh ka katër dritare të ngushta
e të larta që shërbejnë për ndriçimin e naosit, kra-
has dritareve të tilla në murin jugor dhe atë pe-
rëndimor.

Si në mjaft nga kishat e Bregut të Detit am-
bienti i altarit ndahet nga naosi nëpërmjet një iko-
nostasi prej druri. Në anën lindore kemi absidën
rrethore në brendësi dhe me nike në anën e ja-
shtme. Si protezis dhe diakonikon shërbejnë nike
të vogla të harkuara në muret verior, jugor e lin-
dor.

Muret e kishës janë ndërtuar me gurë gëlqe-
rorë të çrregullt e të lidhur me llaç gëlqereje. Ata
janë të rrafshtë dhe përfundojnë me korniza prej
pllakash guri. Kisha mbulohet me çati dyjësë me
rrasa guri, mbi të cilën del tamburi mbi një baza-
ment të çrregullt.

Duke u nisur nga gjasimet në ndërtimin pla-
nimetrik-vëllimor vendosjen e dritareve dhe tekni-
kën e ndërtimit, në kishat e tjera të Bregut të De-
tit, mendojmë se kisha e Shën e Premtes në Lukovë
duhet të jetë ndërtuar në fund të shekullit XVII.

Kisha e manastirit të Shën Mërisë në Nivan të
Gjirokastrës është ndërtuar në vitin 1702 dhe për-
bëhet nga naosi, ambienti i altarit dhe narteksi.
Narteksi në anën perëndimore është shtuar më vo-
në. Ai mbulohet me çati me strukturë të drunjtë,
dhe është i ndërtuar me teknikë më të dobët. Në
narteks hyhet nga porta në anën perëndimore, mbu-
luar me arkitra të rrafshtë, mbi të cilin në një ka-
mare ruhen datat 1777 dhe 1889. Data e parë është
ajo e ndërtimit të narteksit e dyta e ndonjë rindër-
timi të mundshëm. Dy dritare të ngushta si fren-
gji janë në të dy anët e portës, një tjetër në mu-
rin verior, ndërsa një kamare në atë jugor. Nëpër
narteks me një portë në murin perëndimor të ki-
shës kalohet në naos, në brendësi të të cilit janë
gjashtë kolona të vendosura në dy rreshta që e
ndajnë në tre nefe kishën.

Në drejtimin veri jug-kalojnë një sërë har-
qesh të ulët nga kollonat në muret anësore, ndër-
sa harqe në nivel më të lartë ndërmjet kolonave.
Këto të fundit shërbejnë si brinjë qëndrueshmërie
për qemerin cilindrik me formuese lindje perëndim
të nefit qendror. Nefet anësorë janë mbuluar me
qemerë cilindrikë me formuese veri jug duke rezul-
tuar kështu të hapura ndaj nefit qendror. Mbi ka-
tër kolonat më nga lindja ngrihet mbi trekëndsha
sferikë tamburi cilindrik me kupolën sferike. Naosi
ndriçohet nga katër dritare të vogla në tambur dhe
dy dritare në murin verior dhe jugor.

Ambienti i altarit ndahet nga naosi nga një
ikonostas i vendosur përpara kolonave lindore. Am-
bienti i altarit përbëhet nga bema gjysëm rretho-
re, protezisi e diakonikoni anash saj me një nike
të vogël gjysëm rrethore. Një kamare është në mu-
rin verior, një aritare e mbyllur më vonë në absidë.

Në anën e jashtme kisha paraqitet me mure
të rrafshtë dhe pa ndonjë zbukurim. Muret janë
ndërtuar me gurë gëlqerorë lidhur me llaç gëlqere-
je dhe me një suvatim më të vonë dhe mjaft të ho-
llë. Në suvatimin e tamburit dhe absidës rrethore ja-

3. A. Meksi, P. Thomo, Arkitektura pasbizantine (kishat me strukturë në formë kryq
me kupolë), «Monumentet» 20, 1980 (në shtyp).

në formuar disa harqe të lehtë. Në ndërtimin e saj vëllimor kisha e manastirit të Nivanit afrohet me bazilikat e Bregut të Detit, ndërsa trajtimi i saj është i njëjtë me të gjitha kishat e zonës së Gjirokastrës.

Kisha e Shën Mëhillit në Mingul të Gjirokastrës përbëhet nga narteksi, naosi dhe ambienti i altarit, që i takojnë ndërtimit të parë dhe një narteks i dytë në anën perëndimore me një hajat të hapur mbi pilastra guri në anën jugore të shtuar më vonë. Kjo shtesë e dallueshme ngaqë del si vëllim i veçantë, është me mure guri lidhur me llaç gëlqereje dhe mbuluar me çati druri e rrasa guri. Ajo përbëhet nga dy ambiente nga të cilët ai verior nuk komunikon me kishën. Në të hyhet me portën në anën perëndimore anash së cilës janë dy dritare të mëdha kuadrato. Ambienti tjetër, më i çrregullt në plan, ka një portë në anën jugperëndimore dhe shërben për hyrjen në kishë. Në naos hyhet gjithashtu edhe nga portiku jugor i hapur mbuluar me çati druri mbi pilastra. Narteksi me planimetri drejkëndëshe ka në brendësi dy pilastra nga të cilat në muret perëndimor e lindor kalojnë harqet e harkadave që e ndajnë në tre pjesë. Harqe kalojnë gjithashtu edhe në muret verior dhe jugor për të krijuar mbështetjen për kësulat sferike të mbulimit të pjesëve anësore të narteksit, nga dy për çdo krah. Pjesa qendrore mbulohet në nivel më të lartë me qemer cilindrik me formuese lindje perëndim. Narteksi ndriçohet nga dy dritare kënddrejta në anën veriore.

Në brendësi të naosit kemi gjashtë pilastra me prerje katrore mbi të cilat kalojnë harkadat që ndajnë nefet dhe harqet e ulët në muret verior dhe jugor. Për pjesën e naosit mbulimi i nefeve anësore bëhet me kësula sferike, ndërsa nefi qendror mbulohet me qemere cilindrikë me formuese lindje perëndim. Mbi pilastrat më nga lindja ngrihet tamburi mbi trekëndsha sferikë nëpërmjet një ngushtimi me dy harqe në drejtimin lindje perëndim. Naosi ndriçohet nga dy dritare në anën jugore dhe një e madhe në anën veriore, si dhe katër dritare të ngushta dhe të vogla në tamburin e kupolës.

Ambienti i altarit ndahet nga naosi me ikonostas druri. Ai përbëhet nga bema, absida gjysëm rrethore e mbuluar me qemer, vazhdim i atij të nefit qendror, protezisi dhe diakonikoni. Protezisi mbulohet me qemer cilindrik me prerje çerek rrethi. Në të kemi dy nike rrethore, njëra nga të cilat del

me absidë të vogël në murin e jashtëm. Diakonikoni mbulohet me qemer cilindrik me formuese verior jug dhe ka në murin lindor një nike dhe një kamare. Ambienti i altarit ndriçohet nga një dritare në murin jugor dhe një dritare e vogël mbi absidë.

Muret e kishës janë ndërtuar me gurë shtufi lidhur me llaç gëlqereje. Dyshemeja e kishës është shtruar me pllaka guri të bardhë. Muret e jashtme mbarojnë me një kornizë të rrafshët. Çatia është me rrjedhje uji nga veriu dhe jugu. Në anën lindore, pjesa qendrore ka rrjedhje uji nga lindja. Mbi çatinë e mbuluar me rrasa guri del bazamenti i kupolës, me fronton në anën veriore dhe atë jugore e mbi të tamburi cilindrik i suvatuar në një kohë të dytë.

Nga ndërtimi planimetrik e vëllimor, një hallkë e ndërmjetme me bazilikat që mbulohen me qemere e kësula sferike, nga teknika e ndërtimit kisha duhet të jetë e ndërtuar gjatë shekullit të XVIII.

Kisha e manastirit të Shën Pjetrit në Vithkuq të Korçës është qendra kompozicionale e një kompleksi ndërtimesh që formojnë manastirin e ngjitur mbi një kodër në verilindje të fshatit.⁴ Kisha rrethohet nga konakët e manastirit, ndërsa në lindje të saj ishte ndërtuar një faltore e vogël me dy kate, e cila shërbente dhe si varrezë. Nga dëshmitë e ruajtura dhe fotografitë përpara shkatërrimit të manastirit mësojmë se konakët ishin ndërtesa mjaft të forta, të ndërtuara me gurë dhe shqueshin për një trajtim të pasur arkitektonik e dekorativ.

Një mbishkrim mbi portën veriore, në anën e brendshme, dëshmon se kisha është e pikturuar në vitin 1764.⁵ Nga ana arkitektonike kisha përfaqëson një nga shembujt më të arritur dhe të avancuar të këtij nëngrupi. Në gjendjen e sotme ajo përbëhet vetëm nga naosi, Në anën perëndimore ruhen gjurmët e narteksit. Hyrja veriore e kishës paraprihet nga një portik katror. Në këndet e katrorit ngrihen pilastrat, të cilat lidhen me harqe në të katër drejtimet dhe mbi to mbështetet një kalotë sferike.

Naosi ndahet në tre nefe gjatësorë nga dy rreshta me nga katër kolona secila. Në çiftin lindor të kolonave, me prerje katrore në ndryshim me kolonat e tjera që kanë prerje rrethore, është mbështetur ikonostasi, që ndan ambientin e altarit. Është e vetmja ndarje që e veçon këtë pjesë, sepse nga ana

4. Nga ndërtimet e manastirit ruhet vetëm kisha dhe një faltore e vogël varrezë, ndërsa konakët që e rrethonin atë janë djegur dhe shkatërruar gjatë Luftës së Dytë Botërore.

5. V. Puzanova, *Prapë mbi artin shqiptar të shekullit XVIII*, «Buletin i Universitetit Shtetëror të Tiranës», Seria për Shkencat Shoqërore, 2, 1958, 152.

strukturale e mbulesës, ambienti i altarit nuk dallohet nga pjesa tjetër e kishës. Në anën lindore dallohet jashtë tre absida rrethore, që përfundojnë në tre nefet, nga të cilat ajo qendrorja është me përmasa më të mëdha, si në plan, ashtu dhe në lartësi. Po kështu si zakonisht nefi qendror është më i gjerë dhe më i lartë se dy nefet anësorë. Ai mbulohet me qemerë cilindrikë me formuese lindje perëndim, të cilët fitojnë një shkallëzim të lehtë në lartësi, duke filluar nga bërthamat skajore, lindore e perëndimore, në drejtim të qendrës, për të arritur në një theksim të dukshëm vertikal në pjesën qendrore, nëpërmjet kupolës së ngritur lart me anë të një tamburi.

Nefet anësorë nuk e kanë atë aks të vazhduar gjatësor, që vërehet në nefin qendror. Ata janë ndarë në bërthama katrore, të formuara nga harqe që lidhin ndërmjet tyre kolonat dhe këto të fundit me muret anësore. Katër bërthama skajore të çdo nefi janë të mbuluara me kalota sferike, ndërsa bërthamat qendrore që kanë gjerësinë dhe lartësinë e nefit qendror, mbulohen me qemerë dhe formojnë në këtë mënyrë një nef tërthor, në ndërprerjen e të cilës me nefin qendror ngrihet kupola.

Çatia e gjerë dyujëse, që mbulon të tre nefet, kryqëzohet nga çatia e nefit tërthor dhe në ndërprerjen e tyre lartësohet tamburi tetëfaqësh. Nefi tërthor del në pamjet veriore dhe jugore në formën e frontoneve trapezoidale.

Ekzistenca e nefit tërthor, pasqyrimi i tij në ndërtimin volumor të jashtëm dhe kupola mbi tambur të lartë, bëjnë që në formulimin arkitektonik të jashtëm kjo kishë të shëmbëllojë me kishat e grupit të dytë tipologjik, ato me strukturë kryqi me kupolë.

Kisha është e ndërtuar me gurë të lidhur me llaç gëlqereje. Punimi i muraturës është i pastër, por pa përpunim dekorativ. Kisha shëmbëllohet me një masë të gurtë e të rrafshët, e mbuluar gjithashtu me rrasa guri. Të vetmet elementë që e thyjnë këtë masë të mbyllur janë dritaret e hapura në murin verior dhe lindor, meqënëse në anën jugore kisha i është afëruar shtëpërimi një ngritjeje të terrenit si dhe konakëve të dikurshëm.

Por megjithatë proporcioni harmonik i brendshëm dhe i jashtëm lëvizja e volumeve në mbulesë në faqen lindore, me nxjerrjen e tre volumeve të absidave dhe thyerjen që i jep portiku në anën veriore duke shtuar dhe realizimin e mirë teknik të muraturës dhe të sistemeve të kurbuara, dëshmojnë për një nivel të lartë profesional dhe artistik të mjeshtrëve, të cilët duket se zotëronin mirë njohuritë mbi ndërtime të tilla, dinin t'i organizonin mirë volumet dhe e kishin ndjenjën e hapsirës së brendshme.

Kisha e Shën Mërisë në Postenan të rrethit të Ersekës për nga ndërtimi planimetriko-vëllimor i

brendësisë afrohet me kishat e nëngrupit të dytë, nga të cilët dallohet vetëm për kupolën mbi tambur të ulët që del vetëm pak mbi çatinë dyujëse me rrasa guri.

Kisha përbëhet nga narteksi, naosi dhe ambienti i altarit që janë të ndërtimit të parë, të cilave u janë shtuar një hajat i hapur në anën jugore dhe një ambient me planimetri drejtkëndëshe në anën veriore për ku është hyrja për në kishë. Narteksi në anën perëndimore është i mbuluar me çati druri. Muri perëndimor i tij shërben për të mbajtur dherat në këtë anë dhe ka vetëm dy dritare. Dy dritare të tjera janë në anën perëndimore. Për në naos kalohet nga porta në murin perëndimor që ka anash dy dritare. Me pesë këmbë shkallë zbritet në naosin e ndarë në tre nefe nga dy rreshta shtyllash mbi të cilat kalojnë harqe gjatësorë (lindje-perëndim), e tërthor (veri-jug). Këto harkada përbëjnë strukturën mbajtëse të mbulesave të nefeve. Nefi qendror mbulohet me qemer cilindrik me formuese lindje perëndim me brinjë qëndrueshmërie harqet tërthor. Në hapsirën e mezit ngrihet kupola mbi tamburin e ulët me dritare vetëm në anët jugore e veriore që dalin mbi çati. Nefet anësorë mbulohen me qemerë çerek rrethi.

Ambienti i altarit ndahet nga naosi nëpërmjet një ikonostasi prej muri me dy hyrje, njëra, më e madhja, në qendër, tjetra, afër murit verior. Bema me absidën rrethore mbulohet me qemer cilindrik vazhdim i atij të nefit qendror. Protezisi dhe diakoni me qemer si nefet anësorë. Protezisi ka një nike rrethore me një dritare të vogël dhe një kamare në murin verior. Ambienti i altarit ndriçohet dhe nga dritarja e ngushtë e absidës dhe një tjetër në murin mbi të.

Muret e kishës janë ndërtuar me gurë shtufi lidhur me llaç gëlqereje. Trajtimi i tyre është pa më të voglin zbukurim. Kisha mbulohet me çati dyujëse me rrasa guri, mbi të cilën del vetëm tamburi i ulët. Duke u nisur nga ndërtimi vëllimor dhe teknika e ndërtimit kisha duhet të jetë ndërtuar në shekullin e XVIII.

Kisha e Shën Mërisë në Leusë të Përmetit përbëhet nga narteksi dy katësh në anën perëndimore, naosi me ambientin e altarit të cilave u shtohen në një kohë të dytë një hajat i hapur mbi harkada në tërë gjatësinë e kishës në anën veriore dhe një paraklis në anën jugore.

Në narteks hyhet nga porta në anën perëndimore anash të cilës janë dy dritare. Narteksi ka dy kate të ndara nga dy harqe që mbështeten në gjashtë shtylla të vendosura në dy radhë. Në katin e dytë hipet nëpërmjet shkallëve të vendosura në qoshen jugperëndimore. Ky kat ndriçohet nga dy dritare në anën veriore. Narteksi komunikon me naosin nëpër-

mjet portës në murin perëndimor me nga dy dritare në anët e saj.

Në naos zbritet me katër këmbë shkallë. Naosi ndahet në tre nefe nëpërmjet dy harkadave të larta me nga katër shtylla e një pilastër në anën lindore secila. Harqe kalojnë gjithashtu mbi kolonat në drejtimin veri-jug, më të ulët harqet e nefëve anësore, më të lartë ai i nefit qendror. Në këtë mënyrë krijohet struktura mbajtëse e mbulesës me qemer e kësula sferike të kishës. Nefet anësore mbulohen me kësula sferike, ndërsa nefi qendror me qemer cilindrik me formuese lindje perëndim që ka si brinjë qëndrueshmërie harqet e harkadave tërthore. Në hapsirën e mesit kemi kupolën me tamburin e ngushtë e të lartë. Meqënëse kjo hapsirë është drejtkëndëshe, katrori nga i cili me trekëndësja sferikë krijohet baza rrethore e tamburit, formohet me dy harqe anash harkadës gjatësore dhe një ngushtim të harkuar. Tamburi ka dymbëdhjetë dritare të ngushta. Naosi ndriçohet nga katër dritare në anën jugore dhe pesë në anën veriore. Dritaret janë të mëdha, drejtkëndëshe dhe në brendësi vinë duke u zgjeruar në anën e poshtme për të rritur ndriçimin.

Ambienti i altarit përbëhet nga bema me absidën e mbuluar me qemer cilindrik, nga protezisi dhe diakonikoni me nga dy nike në murin lindor dhe kamare në muret anësore. Ambienti i altarit ndahet nga naosi me një ikonostas druri me vlera artistike të mëdha. Ambienti i altarit ndriçohet nga tre dritare në faqen lindore dhe një në atë veriore. Hajati i shtuar më vonë është hapur në anën veriore mbi shtylla guri dhe i suvatur. Në anët e mureve ai ka sofate, karakteristikë e këtij lloji hajati.

Muret e kishës janë ndërtuar me gurë shtufi e llaç gëlqereje ato janë të rrafshta dhe pa ndonjë zbukurim. Çatia është dyjësë me rrasa guri dhe mbi të del tamburi. Si kohë e ndërtimit, duke u nisur nga ndërtimi i brendshëm, forma e strukturave e teknika e ndërtimit duhet të jetë fundi i shekullit XVIII.

Kisha e Shën Thanasit në Leshnicë të Poshtëme të Sarandës është ndërtuar në vitin 1797. Përbëhet nga narteksi mbuluar me çati druri dikur i hapur me harkada në të tre faqet, naosi dhe ambienti i altarit. Naosi është i ndarë në tre nefe nga gjashtë kolona të gurta mbi të cilat kalojnë dy harkada në drejtimin lindje perëndim. Harkada të tjera kalojnë nga muri verior në kolonat dhe në murin jugor. Nefi qendror mbulohet me qemer cilindrik me formuese lindje perëndim duke patur harqet e mësipërm si brinjë qëndrueshmërie. Ne-

fet anësore mbulohen në dy hapsirat e para nga perëndimi me kësula sferike dhe me qemer cilindrik me formuese veri-jug në hapsirën qendrore. Pjesa që i takon nefit qendror mbulohet me kupolë mbi trekëndësja sferikë dhe me një tambur relativisht të lartë. Naosi ndriçohet nga katër dritare të ngushta si frengji, një dritare tjetër në anën jugore dhe dritaret e vogla të tamburit.

Ambienti i altarit ndahet nga naosi me ikonostas druri dhe përbëhet nga bema me absidën rrethore në brendësi dhe trefaqëshe në anën e jashtme. Protezisi dhe diakonikoni mbulohen me kësula sferike dhe kanë nga një nike rrethore në murin lindor dhe një kamare në muret anësore.

Në anën e jashtme kisha ka mure të rrafshët, që përfundojnë me një kornizë prej gurësh në formë dhëmbë sharre. Muret janë ndërtuar me gurë gëlqerorë lidhur me llaç gëlqereje, me tendencë horizontaliteti të rradhëve. I vetmi zbukurim është trajtimi me nike të gjata e të ngushta mbuluar me harqe tullash i faqeve të absidës. Kisha mbulohet me çati dyjësë me rrasa guri. Mbi të del tamburi trefaqësh, në secilën prej të cilave ka nga një nike. Mbi to kalon një brez me tulla të vendosura pjerrtas. Në mes të këtij brezi dhe nikeve ka kryqe prej guri të gdhendur. Tamburi përfundon me kornizë prej gurësh të vendosur në formë dhëmbësh sharre.

Kisha e manastirit të Shën Kozmait në Kolkondas të Fierit ndërtuar në vitin 1814 me ndihmën e Ali Pashë Tepelenës, në ndërtimin planimetrik e vëllimor paraqitet mjaft e zhvilluar. Ajo është vendosur pranë konakëve të vona të manastirit, me të cilët lidhet me një ambient në anën perëndimore, bashkëngjitur narteksit. Aty pranë ndodhen edhe rrënojat e kishës së Shën Mërisë ndërtuar në vitin 1782.⁶⁾ Kisha përbëhet nga naosi me ambientin e altarit. Në të hyhet nga porta perëndimore dhe ajo veriore, që sot shërben si hyrje kryesore e mbrojtur nga një portik me shtylla e çati druri. Porta me shpatulla guri njëcopësh mbulohet me hark trefletësh.

Naosi treabsidësh ndahet në tre nefe nga dy harkada që mbështeten në pilastra në murin perëndimor, në katër kolona me pilastra prapa ikonostasit dhe në murin lindor. Nga kolonat dhe pilastrat kalojnë harqe të ulët në murin verior e jugor për të krijuar mbështetjen për kupolat e nefëve anësore. Nefi qendror dhe krahët verior dhe jugor të kryqit mbulohen në nivel më të lartë me qemere cilindrikë përkatësisht me formuese lindje perëndim dhe veri jug. Në veri dhe jug krahët e kryqit që dalin

6. Material në Arkivin e Institutit të Historisë (më tej A. I. H.)

dhe mbi çatinë dyujëse me tjegulla të naosit, përfundojnë me frontone, në formë transepti. Në kryqëzimin e krahëve të kryqit me ndihmën e trekëndshave sferikë ngrihet tamburi me kupolën. Në anën e jashtme, tamburi sot i suvatur, është tetëfaqësh dhe ngrihet mbi një bazament kubik. Tamburi ka katër dritare të ngushta dhe përfundon me kornizë horizontale dy rradhësh prej guri. Naosi ka në krahët jugor e verior të kryqit dy absida gjysëm rrethore si në brendësi dhe në anën e jashtme, të cilat nuk kanë dritare. Naosi ndriçohet edhe nga tre dritare në murin verior dhe tre në atë jugor. Dritaret janë të mëdha me shpatulla dhe arkitra të rrafshët guri njëcopësh.

Ambienti i altarit ndahet nga naosi me një ikonostas prej druri. Ai përbëhet nga bema me absidën rrethore, protezisi dhe diakonikoni me nga një nike rrethore në anën lindore e një dritare në muret anësore. Bema mbulohet me qemer cilindrik vijim i atij të naosit, ndërsa anët me kupola si të nefëve anësore. Në anën e jashtme absida është shtatëfaqëshe me shtatë nike të shkallëzuara me koloneta në qoshet dhe mbuluar me harqe gurësh të skuadruar. Mbi to vijnë dy rreshta gurësh dhe korniza në formë dhembë sharre. Në hapsirën e mesit në vendin e zakonshëm të dritares që këtu mungon, është pllaka me mbishkrimin ndërtimor.

Kisha është ndërtuar me gurë gëlqerorë të lidhur me llaç gëlqereje. Si në gjithë ndërtimet pasbizantine të vona ka rëndësi dhe pamja e jashtme që këtu me krahët e kryqit në dukje, pjesët ndërmjet tyre nga ana lindore më të ulta, merr një ndërtim piramidat të afërt me kishat e periudhës para pushtimit turk, shembullin më të afërt nga të cilat e kemi në Pojan nga vinë materiali ndërtimor dhe mjaft fragmente antike.

BAZILIKAT E MBULUARA ME SISTEM QEMERESH E KËSULASH SFERIKE

Në monumentet e këtij nëngrupi janë realizuar arritjet më të larta arkitektonike e konstruktive të arkitekturës sonë pasbizantine krijime pikërisht të kësaj periudhe. Dallimi i pjesëve ose i bërthamave të veçanta në hapsirën e brendshme të naosit, vihen re edhe në ndërtimet e grupit të parë. Por në monumentet e këtij nëngrupi këto orvatje kthehen në koncept kompozicional, duke na dhënë një larmi zgjidhjesh strukturale dhe figurative. Në dallim me nëngrupin e parë kompozimi dinamik i bren-

dësisë nuk shfaqet në pamjet e jashtme, por mbetet i fshehur nën mbulesën e gjerë dyujëse. Monumentet e këtij nëngrupi dallohen gjithashtu nga përmasat e mëdha dhe nga përkujdesja për trajtimin arkitektonik e dekorativ të pamjeve të jashtme. Monumente të tilla u ndërtuan kryesisht gjatë shekullit XVIII në zonën e Korçës, por nuk mungojnë ndërtime me interes edhe në Berat dhe në fshatrat e Gjirokastrës.

Kisha e Shën Mëhillit në Vithkuq është ndërtuar në vitin 1682⁷⁾ pra ndërtimi më i vjetër që njohim deri më sot nga kishat e këtij nëngrupi. Në këtë kishë fillojnë e forcohen prirjet për diferencime pjesësh, për një konceptim më të larmishëm hapsiror dhe për theksime qendrore jo më nëpërmjet një kupole mbi tambur por të izoluar, si të kishat e nëngrupit të parë, por nëpërmjet një kompleksi më të lidhur hapsiror.

Kisha përbëhet nga naosi, narteksi, që i bashkëngjitet në anën perëndimore dhe hajati që shtjellohet gjatë gjithë gjatësisë së kishës në anën jugore. Dy rreshta me nga katër kolona dhe një pilastër secila e ndajnë naosin në tre nefe gjatësore, nga të cilët nefe qendror është më i gjerë dhe i lartë nga nefet anësore. Kolonat lidhen ndërmjet tyre dhe me muret perimetrale me harqe në të dy drejtimet. Por ndërsa në nefet anësore krijohen bërthama të vogla, të mbuluara me kësula sferike, në nefin qendror ato dalin si brinjë qëndrueshmërie të qemerit gjatësor që mbulon gjithë hapësirën. Në këtë bazilikë fuqizohet nefe tërthor, me mbulesë që hapet ndaj nefit qendror. Hapësira e madhe e këtij nefe e ka thyer ritmin e shpeshtë të kolonave, duke krijuar në pjesën qëndrore të naosit një ambient hapësinor, i cili fiton një theksim vertikal të dukshëm nëpërmjet mbulimit me kupolë, të ngritur në kryqëzimin e nefit qendror me atë tërthor. Megjithatë kjo strukturë e larmishme është e fshehur nga çatia e gjerë dyujëse.

Në anën lindore del jashtë absida, e cila është trajtuar me një varg pilastrash, të lidhura me harqe të shkallëzuar, në formë fund lundre dhe që përfundon me një kornizë guri të gdhendur. Motivi i hartut fund lundre i thelluar në krahasim me rrafshin e muraturës takohet dhe në dritaret e hapura në faqen lindore, në absidë dhe në faqet e plota.

Narteksi i është shtuar në një kohë më të vonë kishës. Ai ruan një rresht me kolona guri të lidhura me harqe në drejtimin gjatësor, ndërsa rreshti i dytë ka shtylla druri. Mbulesa është me çati druri pa tavani.

7. Material në A. I. H.

Hajati në anën jugore hapet në një harkadë mbi kolona të holla guri në pjesën e përparme.⁸⁾ Mbulesa e hajatit ishte me konstruksion druri, pa tavan, si vazhdim i flegres së çatisë së kishës.

Materiali i përdorur gjerësisht në ndërtimin e kishës, është guri çmërs, mjaft i lehtë e i punueshëm, që gjendet me shumicë në vend. Ky gur është përdorur jo vetëm për mbulesat por edhe për muraturën.

Prirjet për krijimin e një ambienti sa më hap-sinor dhe të lidhur që shfaqen në kishën e Shën Mërisë të Vithkuqit shihen më tej dhe arrijnë të kristalizohen dhe të përsosen si koncept kompozicional në kishat e Vithkuqit, të gjysmës së parë të shekullit XVIII. Është kjo periudha e lulëzimit më të madh ekonomik e kulturor të qytetit të Voskopojës.⁹⁾ Gjatë kësaj periudhe Voskopoja merr një zgjerim të madh, me një strukturë të përparuar urbanistike dhe me ndërtime të shumta, më të rëndësishmet e të cilave janë «Akademia e Re», shtypshkronja, një numër i madh ndërtimesh kulti, etj.¹⁰⁾ Aktiviteti i madh ndërtimor dhe mundësitë materiale të këtij qyteti dësh-mohen dhe nga ndërtimi brenda një kohe të shkurtër, katër vjeçare, e tri bazilikave me përmasa të konsiderueshme dhe me një nivel arkitektonik e konstruktiv të lartë.¹¹⁾ Nga këto ndërtime kanë arritur deri në ditët tona pesë bazilika të mëdha.

Kisha e Shën Mërisë në Voskopojë ka qënë kisha katedrale e qytetit, e ndërtuar në lagjen Sharxa (më vonë e emëruar lagja e Shën Mërisë) në vitin 1712, sipas një mbishkrimi të ndodhur mbi portën perëndimore të kishës.¹²⁾ Është kjo data më e hershme e ndërtimeve të tilla bazilikale në qytetin e Voskopojës, i cili në vitet e mëvonëshme u pasurua dhe me ndërtime të tjera të këtij tipi.

Siç shihet nga një fotografi e marrë para djegies së Voskopojës në vitin 1916,¹³⁾ si dhe nga gjurmët e rrënojave, këtu kemi pasur të bëjmë me një kompleks ndërtimesh. Në oborr, ngjitur me këmbanaren duhet të ketë qënë selia e mitropolisë dhe ngji-

tur me të, në anën lindore, një kishë tjetër. Në pjesën perëndimore të kishës së sotme shtjellohej nar-teksi, që formonte me kishën një planimetri në formën e gërmës L. Ky duhet të ishte një ndërtim dykatësh. Në pamjen lindore kati përdhe ishte trajtuar me një harkadë ndërsa kati i dytë me dritare. Në gjendjen e sotme nga ky kompleks ka mbetur vetëm kisha dhe një ndërtim i vogël që i bashkëngjitet asaj në pjesën veriore.¹⁴⁾ Ky ndërtim përmban kriptën e mbuluar me sistem të kurbuar.

Edhe vetë kisha nuk ruhet e plotë. Në pjesën e jugut të saj duken gjurmët e qemerëve që mbulo-nin hajatin, të cilët u prishën gjatë Luftës së dytë botërore, ndërsa arkada ballore u rrëzua përfundimisht nga tërmeti i vitit 1960. Nga fotografitë e vjetra, gjurmët e mbetura si dhe analogjia me kishat e tjera po të këtij tipi nuk është e vështirë rikonstruktimi i hajatit. Mbi një parapet prej muri guri ngriheshin gjashtë kolona të holla guri me pre-rje rrethore, që përfundonin me kapitete piramida-le. Kolonat lidheshin ndërmjet tyre, me pilastat në skajet lindore e perëndimore, si dhe me murin jugor të kishës, me harqe në të dy drejtimet, duke krijuar në këtë mënyrë shtatë bërthama të cilat duhet të kenë qënë mbuluar me kalota sferike ose sisteme të tjera të kurbëzuara si qemere të kryqëzuar. I gjithë ky sistem mbulohej nga zgjatimi i flegres së çatisë së kishës.

Megjithëse ndërtimi i jashtëm krijon përshtypje për një ndërtim solid dhe madhështor, ai nuk mund të zbulojë madhështinë që hapet përpara vizitorit kur ndodhet brenda naosit. Niveli i dyshe-mesë së kishës është mjaft më i ulët se ai i jashtëmi për të rritur në mënyrë të ndjeshme lartësinë e kishës. Naosi është një ndërtim bazilikal me tre ne-fe të ndara me dy rreshta kalotash, me nga pesë kolona dhe një pilastër secila. Por kolonat që kufi-zojnë akset e nefeve dhe mbajnë sistemin e mbu-lesave, me përmasat, proporcionimin dhe vendosjen e tyre nuk e copëtojnë hapësirën e brendshme.

8. Gjatë tërmetit të vitit 1960, krahu lindor i harkadës u rrëzua dhe u ringrit nga Ateljeja e Monumenteve të Korçës.

9. S. Adhami, *Të dhëna rreth fizionomisë urbanistike dhe arkitektonike të qytetit mes-jetar të Voskopojës*, «Monumentet» 3, 1972, 101.

10. Po aty, 103, 109.

11. S. Adhami, *Tri bazilika të ndërtuara në Voskopojë brenda katër vjetëve*, «Monu-mentet» 14, 1977, 146.

12. V. Puzanova, *Shënime mbi artin shqiptar në shekullin e XVIII*, «Buletin i Uni-versitetit Shtetëror të Tiranës», 1, 1975, 50, S. Adhami, *Katedralja «Fjetja e Shën Mërisë» në Voskopojë*, «Monumentet» 15-16, 1978, 89-95. Autori mendon se ndër-timi i kishës duhet të jetë kryer më parë, ndërsa viti 1712 duhet të jetë data e përfundimit të pikturës, 97-98.

13. Po aty, 92, fig. 9.

14. Duhet të jetë ndërtuar më vonë dhe është kishëza e Shën Marenës. Material në A. I. H., S. Adhami, *vep. cit.*, 91.

Ato janë të grupuara për të diferencuar pjesët e ndryshme të naosit. Kështu çifti lindor i pilastrave, ku mbështetet ikonostasi ndan nga naosi ambientin e altarit. Ky është mbuluar me qemer cilindrik në nefin e mesit dhe me dy kalota në anësorët. Në pjesën lindore del jashtë një absidë e gjerë dhe e lartë. Kolonat e tjera janë grupuar katër e nga katër, duke krijuar në këtë mënyrë dy bërthama hapësore të mbuluara me kalota sterike në pjesën qendrore, të mbështetura mbi sistemet e kurbëzuara që mbulojnë krahët e këtyre bërthamave. Në këtë mënyrë pershtypja e akseve gjatësorë bazilikalë humbet në sistemin e mbulesës dhe krijohet ideja e ndërprerjes së dy bërthamave në formë kryqi me kupolë. Ambientet këndore mbulohen me kalota sterike ose qemerë të kryqëzuar. Në këtë mënyrë krijohet ndjenja e një hapësire unike nëpërmjet krijimit të dy theksimeve qendrore në nefin qendror në lartësi, përmasa dhe trajtim të njëjtë, hapësira e të cilave përhapet dhe në nefet anësorë, nëpërmjet formimit të dy neteve tërthore. Kisha ndriçohet relativisht bollshëm nga dritaret e hapura në muret verior dhe jugor. Ajo komunikonte gjithashtu me narteksin në anën perëndimore, me anë të portës e dy çifte dritarësh të mëdha të harkuara dhe të ndara me një kolonë të vogël. Dyshemeja e narteksit ka qënë më e lartë nga ajo e kishës. Sipas gjurmëve të ruajtura narteksti duhet të ketë qënë i mbuluar me një sistem të kurbëzuar, tre nefësh, nga të cilët nefi qendror ka qënë më i lartë.

Ndërtimi i kishës është mjaft solid, muratura është realizuar me gurë të skuadruar e të lidhur me llaçon gëlqereje. Të bie në sy faja lindore, e cila dëshmon më mirë për përkujdesjen në trajtimin e jashtëm. Absida është përpunuar me një varg nikeshe të rrafshta e të ngushta që mbyllën në pjesën e sipërme me harqe. Kjo arkadë e rrafshhtë vazhdon edhe në faqet e rrafshta të murit lindor. Sipër saj në absidë kalon një friz dekorativ me tulla të vendosura në formë kurizesh peshku dhe mbi të një i dytë në formë dhëmbësh sharre. Trajtimin arkitektonik dhe dekorativ do ta plotësonte më mirë prania e hajatit i cili siç do ta shohim në shembujt e tjerë, ka tërhequr vëmendjen e mjeshtërve.

Sot kisha është e rrethuar me një mur të ulët, i cili ndërpritet në anën jugore nga porta e hyrjes. Hyrja për në oborr dikur për në kompleks, është

trajtuar në mënyrë monumentale, me qemerë e harqe që mbajnë njëkohësisht këmbanaren elegante e të lartë katërkatëshe që ngrihet mbi të, u ndërtua në vitin 1887.¹⁵⁾

Në mënyrë mjaft të ngjashme me katedralen «Fjetja e Shën Mërisë» janë ndërtuar edhe tri bazilikat e tjera të mëdha të Voskopojës. Ngjashmëria duket si në trajtimin hapësinor të brendësisë, në sistemet konstruktive, teknikën e ndërtimit, në përpunimin dekorativ, ashtu dhe në përmasat. Kështu që më poshtë do të theksojmë vetëm ndonjë veçanti të kishave të tjera.

Kisha e Shën Kollit është ndërtuar për 17 muaj, nga qershori i vitit 1721 deri në shtator të vitit 1722. Është përfunduar së pikturuar nga kryemjeshtëri i shekullit të XVIII David Selenica, i ndihmuar nga nxënësit e tij Kostandini dhe Kristua në tetor të vitit 1726.¹⁶⁾ Kisha e Shën Kollit të Voskopojës është një nga monumentet më të rëndësishëm të vendit tonë, jo vetëm si realizim arkitektonik por edhe nga niveli i pikturës që vesh gjithë brendësinë e kishës dhe të hajatit, por këto të fundit të punuara nga mjeshtër të tjerë të njohur të shekullit XVIII, vëllezërit korçarë Kostandin dhe Athanas Zografi, në gusht të vitit 1750.¹⁷⁾

Kisha ruhet e plotë, me naosin, narteksin në anën perëndimore dhe hajatin në anën jugore. Në qoshen juglindore lartësohet këmbanarja katërkatëshe, e cila sipas mbishkrimit është ndërtuar në vitin 1936. Është monumenti më i plotë që ruhet nga katër bazilikat e tjera të Voskopojës, por edhe kjo e cunguar përse i përket ndërtimeve të tjera të kompleksit. Ashtu si dhe kishat e tjera, kisha e Shën Kollit ishte pjesë e një kompleksi ndërtimor, ku përfshiheshin përveç saj një konak dhe kishëza e Shën Thimiut.¹⁸⁾

Hajati është trajtuar me një sërë kolonash prej guri me ball të ngritura mbi një parapet ose xokol të ulët të ndërtuar me gurë. Lartësia e kolonave është e vogël, me prerje rrethore dhe përfundon me kapitete guri të thjeshtë e të ulët, në formë trungu piramide. Kolonat lidhen me harqe ndërmjet tyre, duke krijuar një harkadë gjatësore, ndërsa në drejtimin tërthor lidhen me murin jugor të kishës dhe formojnë shtatë bërthama katrore, gjashtë nga të cilat mbuloheshin me kalota sferike dhe njëra nga to, ajo e skajit perëndimor, me qemer të kry-

15. S. Adhami, *vep. cit.*, 92, Tiranë 1961, 63.

16. V. Puzanova, *vep. cit.* 46, 50.

17. Material në A. I. H.

18. S. Adhami, *Tri bazilika...*, 149.

qëzuar.¹⁹⁾ Nga portiku ose hajati zbritet me disa këmbë shkallë në naos dhe vetëm atëhere ndjehet madhështia e hapësirës së brendshme.

Ndërtimi i brendshëm i kishës është i njëjti me atë të Shën Mërisë. Edhe këtu qëndron i njëjti koncept kompozicional, d.m.th. grupimi i kolonave për të krijuar dy bërthama hapësinore të mbuluara në pjesën qëndrore me kupolë.²⁰⁾ Ndjenjën e hapësirës së brendshme të rrjedhshme, e fuqizon akoma më tepër aplikimi i sistemeve konstruktive, ku mbizotërojnë linjat e kurbëta, e bëjnë më të rrjedhshme kalimet nga planet vertikale në mbulesë.

Në anën perëndimore kishës i bashkëngjitet narteksti, me planimetri në formë trapezi që del tej konturit të kishës. Një rresht kolonash me aks veri-jug e ndan narteksin në dy nefe gjatësorë. Megjithatë ai mbulohet me një sistem paralele qemeresh cilindrikë, me formuese lindje perëndim. Qemerët mbështeten në harqet që lidhin kolonat me muret anësorë lindorë e perëndimorë të narteksit, ndërsa harkada që lidh kolonat ndërmjet tyre shërben si brinjë qëndrueshmërie e këtyre qemerëve. Narteksti lidhet me naosin nëpërmjet një porte dhe dritareve të hapura në murin perëndimor. Në anën jugore duken shenjat e një ndërtimi që i bashkëngjitej narteksit në këtë krah.

Në trajtimin e jashtëm ndjehet preokupacioni për një përpunim dekorativ, gjë që kompenson kompozimin e thjeshtë volumor, që e fsheh strukturën e brendshme të larmishme. Muratura është e zhveshur por dallohet për një zbatim mjeshtëror e të pastër, me gurë të skuadruar e të lidhur me llaç gëlqereje. Përpunimi dekorativ mjeshtër janë për-

pjekur ta bëjnë nëpërmjet futjes dhe kombinimit, të tullës me gurë dhe nëpërmjet krijimit të frizave dekorativë me tulla. Kështu absida e dalë në anën lindore është gjallëruar me harkadën e rrafshët dhe mbi të frizi me tulla të vendosura në formë kurriç peshku. Harqet janë të ndërtuar me gurë të alternuar me dy tulla dhe të qarkuar me një rradhë tullash. Një ndërtim të tillë kanë dhe harqet e harkadës së portikut. Fasada e portikut përveç frizës së vazhduar me tulla të vendosura në formë kurriç peshku përmban ornamente të tjerë si rrathë, kryqe korniza në formë dhëmbësh sharre, mbishkrime brenda motiveve, etj. I gjithë ky dekor është realizuar me gurë çmërsi dhe tulla të holla.

Në këtë ndërtim të bie në sy jo vetëm niveli i lartë arkitektonik në organizimin dhe proporcionimin e hapësirës së brendshme, por edhe aftësia ndërtimore e mjeshtërve. Kjo shfaqet në njohjen e mirë dhe në zbatimin e shkathët të strukturave të kurbëzuara, në punimin e muraturës, zbukurimet. Strukturat e kurbëzuara në kishat e këtij tipi në Voskopojë, nuk janë të ngarkuara me mbushje. Mbi to mbështetet struktura prej druri e çatisë, e mbuluar me plloça guri. Një ndërtim i tillë krijonte kushte të mira termoizoluese dhe ajrosjeje. Në strukturat e mbulesës janë vendosur dhe qypa qeramike, me grykën e ngushtë (Ø 3-4 cm) të kthyer në drejtim të brendësisë, të cilat kanë shërbyer për efekt akustike, por nuk përjashtohet mundësia dhe e ajrosjes dhe e shkëmbimit të temperaturës, gjë që është një masë për eliminimin e lagështisë së kondensimit. Largimi i ujërave të nëntokës ka që në një tjetër problem që është zgjidhur me sukses. Nën dyshtemenë e kishës kalon një rrjet ka-

19. Në artikullin: «Tri bazilika të ndërtuara në Voskopojë», 148, 156, 160, autori mendon se portikët në këto kisha do të jenë shtuar më vonë për arsye të shkëputjes së muraturës së tyre nga ato të kishës, dhe të lidhjes së dobët me to. Për mendimin tonë këto kisha që në fillim janë konceptuar me portik, gjurmët e harqeve në muraturën jugore të kishës dëshmojnë më së miri për këtë.

Por duke qënë i ndërtuar me konstruksione e peshë të ndryshme nga ato të kishës konstruktivisht ishte e domosdoshme lënia e një fuge ose lidhjeje jo solide me muraturën e kishës, e cila do të loste rolin e fugës së cedimit dhe diletacionit.

Gjatë tërmetit të vitit 1960 portiku u dëmtua mjaft duke u çarë në harqet tërthorë dhe shkëputur nga volumi i kishës. Për këtë u morrën masa restaurimi në vitin 1962, gjatë të cilave u afrua i gjithë portiku me kishën, u konsoliduan harqet dhe kalotat dhe u fiksuan ato me tiranta metalike në drejtimin tërthor. Ekspedita e restaurimit u drejtua nga B. Strazimiri, me pjesëmarrjen edhe të autorëve të këtij artikulli (shih raportin e ekspeditës, Ark. Inst. Mon.). Në vitin 1980 Ateljeja e Korçës, kreu punime të tjera restauruese në këtë monument, që konsistonin në rigjallërimin dhe plotësimin e dekoracionit të portikut.

20. S. Adhami, *Tri bazilika...* (vep. cit.) fq. 147, gabimisht shprehet se ndërtesa është «...me dy kupola mbi tambur». Në fakt kalotat sferike ose kupalat ngrihen mbi harqet dhe qemerët që i mbajnë, pa ndërmjetësinë e tambureve. Ky gabim është bërë edhe për kisha të tjera, Shën Mëhillin, f. 155, dhe Shën Thanasin, fq. 160.

nalesh drenazhimi, të paisura në pika të ndryshme dhe në kënde me puseta kontrolli. Një sistem i tillë drenazhimi është ndërtuar edhe jashtë kishës, në drejtimin verior. Si puse kontrolli janë përdorur qypa të mëdhenj qeramike, të hapur nga sipër dhe me vrimat e hyrjes e të daljes së tubave në nivele të ndryshme. Kanalet e drenazhimit janë ndërtuar dhe mbuluar me ploça guri.

Kisha e Shën Mëhillit. Kronologjikisht është bazilika e tretë e këtij tipi, e ndërtuar në Voskopojë në vitin 1722. Edhe nga ky kompleks ndërtimesh, ku bën pjesë dhe faltoret e Shën Spiridhomit dhe të Shën Vernerës²¹⁾ ka mbetur vetëm kisha e Shën Mëhillit edhe kjo e dëmtuar, jo e plotë. Kisha përbëhet nga naosi, narteksi në anën perëndimore, hajati në anën jugore dhe një ndërtim që i bashkëngjitet kishës në anën veriore. Nga hajati i dikurshëm jugor ka mbetur bërthama më lindore, parapeti ose xokoli ku mbështeteshin kolonat e ballit dhe gjysmës së harqeve në murin jugor të kishës. Por nga disa fotografi të vjetra fitohet një përfytyrim i plotë mbi formulimin arkitektonik të jashtëm.²²⁾ Ashtu si kisha e Shën Kollit edhe kjo kishë kishte hajatin me tetë kolona në ballë, ndërmjet dy daljeve të mureve të ngushtë lindore e perëndimore, ato lidheshin me një harkadë me nëntë harqe në drejtimin gjatësor. Nga pjesa e ruajtur në skajin lindor të hajatit dëshmohej prania e bërthamave të mbuluara me kësula sferike ose qemerë të kryqëzuar.

Ndërtimi i brendshëm i naosit është i njëjtë si koncept me atë të kishave të mësipërme. Por në ndryshim me kompozimin e lirshëm e të rrjedhshëm dhe larminë e sistemeve të kurbëzuara të Shën Kollit këtu kemi një kompozim më rigoroz. Nefi qendror mbulohet me qemer cilindrik i cili ndërpritet me dy nefet tërthorë për të krijuar dy theksimet qendrore të mbuluara me kupola. Bërthamat katrore, të formuara me katër harqe në të dy drejtimet, që krijohen vetëm në nefet anësorë, janë të mbuluara me kësula sferike.

Një ndërtim me interes paraqet dhe narteksi në anën perëndimore. Kolonat dhe pilastrat e vendosura në brendësi të tij lidhen ndërmjet tyre dhe me muret anësorë me harqe në dy drejtimet duke krijuar dymbëdhjetë bërthama të vogla të mbuluara me kësula sferike, qemerë cilindrikë, qemerë të kryqëzuar dhe qemerë me prerje çerek rrethi.

Në naosin verior duken gjurmët e një ndërtimi që i bashkëngjitet kishës nga kjo anë, i cili lidhet me narteksin. Por nga gjurmët e ruajtura nuk mund të kuptohet në ka qënë ndërtim i hapur (portik) apo i mbyllur. Sidoqoftë lartësia e tij ishte më e vogël nga ajo e kishës dhe mbi çatinë e tij janë hapur dritaret nga merr dritë kisha në anën veriore. Ky fakt na bën të mendojmë se duhet të ketë qënë ndërtim i mbyllur në ndryshim me anën jugore, ku dritaret e kishës hapen në hajatin e saj, pra jo ashtu siç mendon S. Adhami,²³⁾ për prezencën e një hajati të dytë nga kjo anë.

Një veçanti në sistemin konstruktiv të kësaj kishë është dhe kalimi nga bërthamat katrore në kësulat sferike. Ky kalim nuk bëhet me trekëndsha sferikë por në këndet e katrorit kupola mbështetet në kolona të vogla ose pilastra prej guri. Në dekorimin e absidës ruhet koncepti i gjallërimit të saj me harkadën e rrafshët, por kjo harkadë nuk vazhdon edhe te muri lindor i kishës. Gjithashtu frizi me tullat sipër harkadës mungon. Megjithatë absida është punuar më me elegancë, niket janë më të hedhura në lartësi, të ndara me pilastra të holla e të profiluara. Harqet kurorëzohen me një rresht tullash të holla dhe mbi to kalon korniza e punuar me gurë të skalitur. Kisha merr dritë nga dritaret e hapura në murin verior, lindor, nga të cilat tre dritare mbi absidë janë rrethore dhe nga ato të hapura në hajatin e kishës. Në murin jugor mbi gjurmët e harqeve, vërehen gjashtë dritare të murosura. Dritaret kanë formë katërkëndëshi kënddrejtë, me arkitra të rrafshët prej guri, por mbi to janë ndërtuar harqe shkarkues.

Kisha e Shën Thanasit, është bazilika e katërt e ndërtuar në Voskopojë sipas të njëjtit tip, në vitin 1724 dhe është pikturuar nga vëllezërit korçarë Kostandin dhe Athanas Zografi, në vitin 1745. Nga ndërtimi i dikurshëm është rrëzuar narteksi në anën perëndimore, si dhe një faltore e vogël e Shën Triadhes.²⁴⁾ Kështu që edhe ky monument e kompleks nuk ruhet i plotë.

Nga ana tipologjike kjo kishë nuk ndryshon nga bazilikat e tjera të Voskopojës. Ka po të njëjtin kompozim planimetrik e volumor sistem konstruktiv dhe formulim të jashtëm. Megjithatë mbetet më prapa të tjerave për sa i përket proporcionimit dhe përmasave. Nefi qendror këtu është më i ngushtë, lartësia më e vogël dhe nuk ka arritur të japë atë

21. V. Puzanova, *Shënime mbi...*, 50. S. Adhami, *vep. cit.*, 157.

22. *Po aty*, 156, fig. 19, 20, 21.

23. *Po aty*, 155.

24. V. Puzanova, *Shënime mbi...*, 50; S. Adhami, *vep. cit.*, 161.

përshtypje madhështie të hapësirës së brendshme si të kishat e tjera.

Edhe në pamjen e jashtme portiku është më i vogël me gjashtë hapësira i ngritur mbi një xokol të ulët. Kolonat i ka monolite, me prerje tetëkëndore që përfundojnë me kapitete të lartë në formë tringu piramide me qoshe të prera. Portiku është i mbingarkuar me dekoracion të ndërtuar me tulla. Gurët e çmërsit, me të cilat është ndërtuar portiku, janë të inkuadruara me tulla dhe ndërmjet tyre ornamentet të ndryshme, rrathë, kryqe, motive bimore që shëmbëllojnë pishën, friza në formë kurriz peshku, etj. Në hajat gjithashtu janë lënë dhe emrat e mjeshtërve²⁵ të shkruar me copa tullash e tjeçullash. Po kështu absida nga ana e poshtme është dekoruar me nike të rrafshata e të shkallëzuara të cilat vazhdojnë edhe në muret lindorë. Tek-tuk në gurët e absidës dhe murit lindor janë gdhendur mjaft rrafshatë figura shpendësh e kafshësh.

Në anën perëndimore ngrihej dikur narteksi, me dysHEME më të lartë se ajo e kishës. Nga gjurmët e harqeve në murin perëndimor të kishës dëshmohej se edhe ky narteks, si të kishat e tjera ka qënë i mbuluar me një sistem harqesh e qemeresh.

Kisha e Shën Gjergjit - Shpëskë. Në afërsi të Voskopojës në veri të saj ngrihet fshati i Shpëskës, i cili gjatë shekullit XVII-XVIII ishte një qendër e rëndësishme krahas Voskopojës dhe Vithkuqit. Për këtë dëshmon dhe kisha e saj, e ngritur mbi një breg në të hyrë të fshatit dhe e rrethuar nga varrezat e fshatit.

Kisha është ndërtuar sipas të njëjtëve principe kompozicionalë me ata të bazilikave të Voskopojës, por megjithatë nuk ka mundur të arrijë atë nivel të lartë arkitektonik të tyre, si në përmasa, në zgjidhjen hapësinore të brendshme, në trajtimin arkitektonik të jashtëm, në nivelin e realizimit teknik e konstruktiv.

Tre pjesët kryesore përbërëse, naosi, narteksi dhe hajati janë vendosur gjatë një aksi gjatësor lindje perëndim. Naosi është një ndërtim bazilikal, i ndarë në tre nefe nga dy rreshta me nga tre kolona e një pilastër secili. Kolonat dhe pilasttrat kanë formuar dy bërthama hapësinore, të mbuluara me kupolë në pjesën qendrore. Kupolat mbështeten mbi qemeret cilindrikë në nefin qendror dhe mbi qemerët e kombinuar të nefeve anësorë, që hapen ndaj atij qendrorit, duke krijuar kështu dy nefe tërthorë. Pjesët këndore të bërthamave qendrore në nefet anësorë janë të mbuluara me kësula sferike. Në pjesën lindore dalin tre absida që përfundojnë

nefet, nga të cilat ajo qendrorja është më e gjerë dhe e lartë.

Në ndryshim nga kishat e Voskopojës në organizimin hapësinor të brendshëm, këtu mungon një ambient suplementar altari. Ai krijohet nga një krah i një bërthame. Në këtë mënyrë theksimi i parë vertikal i nefit qendror vjen menjëherë mbas ikonostasit, që ndan naosin nga ambienti i altarit, pa shkallëzimin karakteristik të bazilikave të Voskopojës.

Naosi paraprihet nga narteksi dhe lidhet me të nëpërmjet një porte. Narteksi ka një ndërtim tipik bazilikal, i ndarë në tre nefe, nëpërmjet dy rreshta kolonash, me nga dy kolona secili. Nefet mbulohen me qemere cilindrikë me formuese lindje perëndim, të cilat mbështeten mbi harqet lidhës të kolonave qendrori, dhe mbi to e në muret verior e jugor dy anësorët.

Në gjithë pamjen perëndimore shtjellohet hajati i hapur me një rradhë kolonash guri në ballë. Kolonat janë punuar trashë, të ulta me bazamente dhe kapitete guri ku mbështeten trarët e çatisë. Hajati është pa tavan. Në plan del tej gjerësisë së kishës. Në murin jugor janë hapur nike për shërbesën fetare, ndërsa në qoshen jugore të saj lartësohet një këmbanare e lartë. Në anën jugore të kishës i është bashkëngjitur një ndërtim i më vonë i cili ka shërbyer si faltore e dytë. Ajo ka planimetri katërkëndëshe këndrejtë, është paisur me tavan dërrase dhe paraprihet, në anën perëndimore nga një ambient, në rolin e narteksit për këtë faltore.

Trajtimi arkitektonik dhe dekorativ i jashtëm është i varfër. Proporcionet janë të ulta dhe të rënda, ku mbizotëron masa e madhe shtypëse e çatisë së gjerë të mbuluar me plloça guri. Muratura e ndërtuar me gurë nuk shquhet për teknikë të lartë. Elementet që thyjnë volumin e plotë e të mbyllur të kishës janë tre absidat që dalin në pamjen lindore dhe këmbanarja e thjeshtë në qoshen jug-perëndimore.

Ky realizim jo i lartë konstruktiv e teknik ka bërë që kisha të pësojë dëmtime të ndjeshme, si-domos nga tërmeti i vitit 1960, që ka sjellë çarje të muraturës, të harqeve e qemerëve. Për përfortimin e kishës janë marrë masa duke ndërtuar kontraforte, kryesisht për të ndihmuar muraturën në thithjen e shtytjeve të sistemeve të kurbëzuar.

Kisha e Shën Gjergjit në Nokovë të Gjirakastres ndërtuar në vitin 1772 përbën një rast të veçantë për mbulimin me qemere vetëm të nefit qendror. Kisha përbëhet prej narteksit në anën perëndimore, naosit me ambientin e altarit dhe një

hajati me çati druri mbi shtylla druri në anën veriore në tërë gjatësinë e kishës. Në kishë hyhet nëpër derën e naosit në anën veriore. Përballë saj, në portik është ndërtuar vonë një këmbanare. Narteksi ka një shtyllë në mes dhe mbulohet me çati e tavan druri. Narteksi lidhet me naosin me një derë në murin në mes të tyre që ka dhe dy dritare anash, dhe ndriçohet nga dritarja jugore. Naosi ndahet me tre nefe nëpërmjet dy arkadave me dy shtylla e tre harqe secila. Nefi qendror i formuar në këtë mënyrë mbulohet me qemer cilindrik me formuese lindje perëndim. Nefi anësorë ndryshe nga gjithë kishat e tipit mbulohen me tavan të rrafshhtë dërrase. Nga një vrojtim mbi tavan rezulton se edhe çatia është prej druri. Naosi ndriçohet nga dy dritare mbuluar me arkitrarë druri në anën jugore. Ambienti i altarit ndahet nga naosi me një ikonostas druri. Ai ka bëmën me absidën gjysëm rrethore, pa dritare, protezisin dhe diakonikonin me nga dy nike në murin lindor dhe një në atë anësor. Ambienti i altarit ndriçohet nga dy dritare në murin jugor dhe një dritare rrethore mbi absidë. Absida është zbuluar me nëntë nike të ngushta mbuluar me hark dhe përfundojnë me një kornizë me një rresht dhëmbësh sharre.

Muret e kishës janë ndërtuar me gurë shtufi e gurë çmërsi të cilët përdoren tepër tek absida. Çatia është mbuluar me rrasa guri.

Kisha e Shën Mërisë në Skore të Gjirokastrës, ndërtuar në vitin 1773 paraqet interes për zgjidhjen e mbulesës së naosit e narteksit me një sistem kupolash të përsëritura në mënyrë të njëjtë në pesë hapësira drite. Në këtë bën dallim hapësira e gjashtë, ambienti i altarit, mbuluar me kupola më të vogla në anët dhe qemer cilindrik me formuese lindje perëndim në qendër.

Kisha ndahet në tre nefe nëpërmjet dy arkadave gjatësore mbi pilastra në muret lindorë e perëndimorë, në kolona dhe pilastra në ndarjet e naosit me narteksin dhe ambientin e altarit. Harqe tërthorë kalojnë nga pilastrat në muret anësorë veriorë dhe jugorë mbi kolonat duke qënë më të lartë në hapësirën e mesit - nefi qendror, më të gjatë se anësorët. Kolonat janë prej guri me kapitule prej stuko reliefi. Duke qënë hapsirat e dritës drejt-këndëshe, baza rrethore e kupolës formohet nëpërmjet një ngushtimi të kurbuar të brinjës më të gjatë në anët veriore dhe jugore. Në narteks hyhet nga porta në anën perëndimore. Ai ndahet nga naosi vetëm me nefet anësorë me një mur të ulët guri e perde dërrasash mbi të. Narteksi zë dy hapësira

drite të strukturës së kishës dhe ndriçohet nga dy dritare në anën jugore dhe një në atë veriore.

Naosi, në të cilin hyhet nga një portë veriore e një jugore që ka tre hapsira drite, ndriçohet bollshëm nga dy dritare në jug dhe dy në veri. Naosi ndahet nga ambienti i altarit nga një ikonostas druri me vlerë dhe zë një hapësirë drite të strukturës, por pak më të ngushtë, dhe për pasojë kupolat anësore janë më të vogla. Bëma ka absidën rrethore pa dritare, për shkak të nivelit të terrenit jashtë saj, protezisin me dy nike dhe diakonikonin vetëm me një.

Në anën e jashtme, kisha është me muraturë të ndërtuar me breza gurësh që këmbehen me rrasa gurësh shtufi. E tillë është edhe këmbanarja e lartë e shtuar më vonë në këndin veri perëndimor. Absida është trajtuar me shtatë nike që mbulohen me harqe në formë fundi lundre, influencë e arkitekturës së ndërtimeve të kultit mysliman.

Në anën veriore kisha ka një hajati të hapur, mbi pilastra, nga i cili mbulohet me kupolë mbi harqe mbajtës pjesa përballë portës, që të fut në naos. Hajati mbulohet me çati vazhdimi i çatisë me katër kullesa të kishës.

Me strukturën e saj kompakte dhe hapsirën e brendshme të goditur e ritmike, kisha dëshmon për mjeshtërinë e ndërtuesve të saj.

Kisha e Shën e Premtes në Përmet ndërtuar në vitin 1776²⁶⁾ përbëhet nga narteksi, naosi me ambientin e altarit dhe hajati në anën veriore. Narteksi në anën perëndimore është në nivel më të lartë se naosi dhe në të hipet nëpërmjet shkallësh. Në narteks ka dritare që shohin në naos dhe dritare në anën perëndimore. Në naos hyhet nga porta në murin verior. Naosi ndahet në tre nefe nëpërmjet dy arkadave që kanë secila tre kolona dhe një pilastër me prerje katrore në anën lindore. Mbi këto kolona dhe pilastrat kalojnë harqe të tjerë rrethorë të ulët, në drejtimin veri jug. Mbi këtë sistem harqesh ngrihet mbulesa me kësula sferike e pjesës qëndrore të naosit. Hapësira e parë e naosit mbulohet me qemerë cilindrikë, më të ulët e me formuese veri-jug anësorët, më i lartë dhe me formuese lindje-perëndim qemer i qendror. Naosi ndriçohet nga dy dritare në anën jugore dhe një në anën veriore.

Ambienti i altarit ndahet nga naosi me një ikonostas druri të vendosur përpara pilastrave. Ai formohet nga bëma me absidën gjysëm rrethore, protezisi dhe diakonikonin. Këta kanë të njëjtin ndërtim, dy nike rrethore në anën lindore dhe nga një tjetër

26. V. Puzanova, *Prapë mbi...*, 156.

në muret anësorë. Ndriçimi i ambientit të altarit bëhet nga dritarja e absidës, një tjetër mbi të dhe dy dritare në pjesën e sipërme të protezisë dhe diakonikonit.

Në anën veriore ndodhet portiku i hapur me arkadë mbi kolona prej rrotullash guri. Ai mbulohet me qemer cilindrik duke pasur dy harqe tërthor në pjesën e hyrjes për në kishë.

Muret e kishës janë ndërtuar me gurë shtufi, lidhur me llaç gëlqereje. Pjesa e absidës shtatëfaqëshe është punuar me gurë të skuadruar dhe me nike mbuluar me harqe tullash. Nga dy nike ka dhe në murin lindor në të dy anët e absidës.

Kisha e Shën Mëhillit në Lagjen «Varosh» në Gjirokastrë ndërtuar në vitin 1776 dhe rindërtuar në vitin 1833 pas djegies së vitit 1828.²⁷ Është një kishë me përmasa të mëdha në një vëllim brenda të cilit janë krijuar naosi dhe ambienti i altarit. Kisha nëpërmjet dy arkadave ndahet në tre nefe. Secila arkadë ka gjashtë harqe që mbështeten në muret lindorë e perëndimorë në dy pilastra dhe në tre kolona ndërmjet tyre. Mbulasa e kishës paraqet një ndërtim struktural të veçantë që nuk e hasim në kisha të tjera. Mbi kolonat dhe pilastrat në drejtimin veri jug kalojnë arkada në nivel më të ulët se harkadat gjatësore që ndajnë nefet. Harqe të tjerë, në nivel më të lartë janë në të dy anët e harkadave gjatësore. Pjesët e formuara në mes kolonave mbulohen në këtë mënyrë me kupola, gjithsej pesë gjatë gjithë nefit qëndror në pjesën që i takon naosit. Nefet anësorë mbulohen me qemere cilindrikë çerek rrethi. Naosi ndriçohet nga pesë dritare drejtëndëshe në anën veriore e pesë të tjera në atë jugore. Hyrja për në naos bëhet nga jugu dhe perëndimi nëpërmjet dy portave që paraprihen nga portikë.

Ambienti i altarit përbëhet nga bëma me absidën rrethore, protezisin dhe diakonikonin me nga një absidë rrethore dhe një nike rrethore ndërmjet tyre e bemës. Mbulesa e tyre është me qemerë cilindrikë me formuese lindje perëndim.

Në anën e jashtme në muret ndërtuar me teknikën tradicionale të Gjirokastrës, shquajnë tre absidat shtatëfaqëshe me nike të mbuluara me harqe të shkallëzuar. Mbi to ka një kornizë horizontale të hollë dhe më lart muri përfundon me kornizë të dyfishtë dhëmbësh sharre. Kisha mbulohet me çati dyujëse e rrasa guri që ka pjesë me rrjedhje uji në murin lindor.

Kisha e Shën Mërisë në Sopik të Gjirokastrës ndërtuar në vitin 1782 paraqet një ndër kishat që

zhvillon më tepër temën e bazilikës me kupola dhe qemere në aspektin e krijimit të një hapësire të brendshme ku mbizotëron si vëllimi i nefit qëndror ashtu dhe ngritja në lartësi. Ajo është pararendëse e bazilikave të fundit të shekullit XVIII e fillimit të shekullit XIX qoftë dhe me mbulesë me tavan, në të cilat ngritja në lartësi dhe krijimi i një vëllimi qëndror gjatësor është tema bazë. Kisha përbëhet nga nartekso dykatësh, naosi dhe ambienti i altarit dhe hajati i hapur në këmbanaren e vonë.

Në narteks hyhet nën këmbanaren, në hapsirën qëndrore të hajatit e cila është e vetmja e mbuluar me kësula sferike sepse pjesët e tjera janë me çati druri, vazhdim i asaj të kishës. Hajati ka pilastra në hyrje dhe në këndet. Harkada është mbi kolona guri. Nartekso është i ndarë në pjesën e poshtme me një mur nga naosi, ndërsa kati i dytë vështron në të nëpërmjet tribunës. Në katin e dytë hipet me dy palë shkallë. Si dyshemeja ashtu dhe çatia e narteksit janë me strukturë druri.

Naosi tre nefësh ndahet nga dy harkada me nga pesë pilastra me prerje katrore por në qoshet të prera që gati formohet një tetëkëndësh. Harkada mbi to është e ulët. Nga kolonat në muret gjatësore të kishës kalojnë harqe të tjerë në këtë nivel, për të formuar mbështetjen e kupolave të nefëve anësorë. Duke qënë gjerësia e nefit qëndror sa dyfishi i atyre anësorë, harqet mbajtës të mbulesës janë më të lartë dhe në krye dy pilastra. Në këtë mënyrë nefi qëndror bëhet mbizotërues dhe me një ritëm që përcaktohet jo nga mbulesa e tij por nga harkadat. Këtë skemë e përsërit dhe kisha e Shën e Premtes në Hllomo ndërtuar në vitin 1829. Naosi ndriçohet nga tre dritare në anën jugore dhe dy në atë veriore. Ambienti i altarit ndahet nga naosi me një ikonostas druri, të gdhendur me teknikën e shpuarjes tej për tej, me vlera artistike të dorës së parë.

Ambienti i altarit mbulohet me kupola si të nefëve anësorë me protezisin dhe diakonikonin dhe me qemer cilindrik me formuese lindje perëndim në pjesën e bemës. Ambienti i altarit ka tre absida gjysëm rrethore në anën e brendshme, më e madhja në qendër dy të voglat anash. Bëma ka dhe një nike rrethore në anën e djathtë të absidës, protezisi një të tillë në murin verior. Ambienti i altarit ndriçohet nga një dritare në jug dhe dritarja mbuluar me hark të shkallëzuar e absidës qëndrore. Në anën e jashtme faqja lindore është trajtuar me përkujdesje të veçantë. Ajo është ndërtuar me gu-

27. L. Rey, *Guide d'Albanie*, Paris 1930, 37; E. Riza, *Qyteti muze i Gjirokastrës*, Tiranë 1981, 47.

rë gëlqerorë me rreshta horizontale lidhur me llaç gëlqereje ndryshe nga muret e kishës që janë me gurë shtufi. Absidat janë mbi bazamente rrethore duke qënë shtatëfaqëshe qëndrorja dhe pesë anësoret. Faqet krijohen prej nikesh që mbulohen me harqe gurësh të rrethuara nga një rresht tullash përgjatë harkut. Absidat përfundojnë me kornizë dhëmbë sharre.

Për të përballuar shtytjet e harqeve në muret anësore dhe rrezikun e hapjes së tyre, në veri dhe jug janë vendosur si masa konservuese disa kundërforca.

Kisha e Shën Sotirit në lagjen «Pazar i Vjetër» në Gjirokastrë ndërtuar në vitin 1784²⁸⁾ paraqet një vëllim të vetëm, brënda të cilit janë ambienti i altarit, naosi dhe narteksi. Brendësia ndahet në tre nefe nëpërmjet dy arkadave me dy pilastra e katër kolona secila. Pilastrat katrorë janë në vendet ku ndahen narteksi me naosin dhe ky i fundit me ambientin e altarit. Narteksi me madhësinë e dy hapësirave të harkadës mbulohet me qemere cilindrike me formuese lindje perëndim për nefet anësore dhe veri jug për nefin qëndror. Për këtë një harkadë tërthor kishës kalon nga muri verior nëpër pilastrat e murit jugor. Në narteks hyhet nga porta perëndimore dhe nga një portë tjetër në anën jugore. Në gjysmën e lartësisë së narteksit është krijuar në një kohë të dytë një kat i dytë në të cilin hypet nëpërmjet një shkalle të jashtme në anën veriore pranë portikut të hyrjes për në naos.

Naosi edhe ai tre nefësh, mbulohet me qemere cilindrike në tërë gjatësinë e tij, me formuese lindje perëndim, më i lartë në qendër, më i ulët në anësorët. Naosi ndriçohet nga tre dritare drejtkëndëshe në anën jugore. Ambienti i altarit ndahet nga naosi nëpërmjet një ikonostasi druri me vlerë të vendosur përpara pilastrave në anën jugore, mbi të cilët kalon një harkadë në drejtimin veri-jug. Ambienti i altarit përbëhet nga bema, protezisi dhe diakonikoni. Bema mbulohet me qemer cilindrik me formuese veri jug. Ajo ka absidën rrethore, me fronin e peshkopit, tre kamare anash saj në pjesën veriore dhe një dritare të vogël në qendër. Protezisi mbulohet me qemer cilindrik me formuese lindje perëndim dhe ka absidën në anën lindore dhe një nike rrethore në anën veriore, pranë së cilës është një portë e vogël. Diakonikoni mbulohet edhe ai me qemer cilindrik të njëjtë me të protezisit, dhe ka në anën lindore absidën dhe një nike rrethore. Ambienti i altarit ndriçohet nëpërmjet tre dritareve të vogla mbi secilën nga absidat.

Në anën e jashtme kisha karakterizohet nga sipërfaqet e rrafshta të muraturës me gurë gëlqerorë të lidhur me llaç gëlqereje dhe të vendosur në rreshta horizontale, karakteristikë kjo për ndërtime të Gjirokastrës. Muret përfundojnë me korniza të drejta prej guri. Me interes është punimi i absidave me shtatë nike mbuluar me harqe prej gurësh. Absida përfundon me korniza prej rreshtash horizontale gurësh dhe rreshta gurësh të vendosur në formë dhëmbësh sharre.

Kisha e Shën Kollit në Topovë të Gjirokastrës, ndërtuar në vitin 1788 përbëhet nga vëllimi i vjetër me narteksin, naosin dhe ambientin e altarit si dhe nga një shtesë e vonë në anët jugore dhe veriore që përfshin kishën. Në narteks hyhet nga porta në anën veriore mbuluar me hark. Narteksi ka dy kolona në brendësi mbi të cilat ngrihet mbi një sistem harqesh gjatësorë dhe tërthorë që shërbejnë si harqe mbajtës, mbulesa me kupolën. Më të ulët janë harqet lindje perëndimore më i lartë ai veri-jugor. Narteksi ndriçohet nga një dritare në murin verior.

Narteksi lidhet me naosin nëpërmjet një porte dhe dy dritareve anash saj. Ai ndahet në tre nefe nga dy arkada me dy kolona e një pilastër në lindje secila. Arkada të tjera kalojnë tërthor nga muri verior në atë jugor mbi kolonat. Ato kanë të ulta harqet e nefëve anësore e të lartë atë qëndrorin. Mbi këtë rrjet harqesh mbajtëse ngrihet mbulesa me kupolën e naosit. Meqënëse hapësirat qëndrore janë drejtkëndëshe baza rrethore e kupolës formohet me një ngushtim. Ky ndriçohet nga dy dritare, një në murin verior tjetri në jugorin duke pasur një portë në murin jugor. Naosi ndahet nga ambienti i altarit me një ikonostas druri përpara pilastrave. Ambienti i altarit përbëhet nga bema me absidën rrethore, protezisi me një nike e dy kamare anash saj dhe diakonikoni me një nike e një kamare në murin jugor. Të tre pjesët mbulohen me qemere cilindrike me formuese lindje perëndim. Muret e kishës janë të rrafshhtë e të ndërtuar me gurë shtufi. I vetmi zbukurim është ndërtimi me nëntë nike i absidës. Kisha mbulohet me rrasa guri mbi çati katër kullimesh.

Në një kohë të dytë kishës i shtohen hajati në anët jugore e veriore, një ambient pranë murit jugor të narteksit dhe këmbanarja në qoshen juglindore. Këto janë të mbuluara me çati me strukturë druri e rrasa guri, vijim i asaj të naosit për krahun jugor dhe duke mbuluar absidën krahui lindor. Portiku jugor ka një harkadë mbi pesë kolona ai lin-

28. E. Riza, Vep. cit., f. 44-47, fig. 35.

dori mbi katër kolona. Në portikët hyhet nga një hapësirë në bazamentin e harkadave në anën jugore e një në atë veriore.

Kisha e Shën Thanasit në Borovë të Ersekës është një ndërtim i ngjashëm me shumë nga kishat e Shqipërisë Juglindore. Nga ajo ruhet vetëm naosi ndërsa pjesët e tjera janë të rrënuara duke u ruajtur vetëm një pjesë e mureve. Në kishë hyhet nga porta në anën perëndimore. Kisha ndahet në tre nefe nga dy harkada me dy kolona e një pilastër secila. Harqe tërthor kalojnë nga kolonat e pilastri në muret verior e jugor ku ka pilastra të dala pak nga faqja e murit. Harqet tërthorë janë dhe ndërmjet kolonës më nga lindja dhe pilastrave për të shërbyer si haqe mbajtës të kësulave sferike nga të cilat ajo në lindje më e vogël. Nefet anësorë mbulohen me qemere në formë çerek rrethi, sipas zgjidhjes tradicionale të zonës. Ambienti i altarit në këtë kishë është më i ngushtë se zakonisht e mbulohet me qemerë cilindrikë. Në anën lindore ka tre absida trefaqëshe njëra për bemën dhe dy të tjerat më të vogla, për protezisin dhe diakonikonin. Protezisi ka një nike tjetër në faqen lindore dhe dy kamare të vogla.

Kisha ndriçohet nga disa baxha. Ajo karakterizohet në anën e jashtme nga faqet e rrafshëta të mureve të ndërtuara me gurë shtufi. Po me gurë shtufi por të skuadruar është dhe portiku me pilastra dhe harkadë në anën jugore. Një sërë kundërforcash janë në anën veriore. Sipas ndërtimit vëllimor, kisha duhet të jetë ndërtuar në fund të shekullit XVIII.

Kisha e Shën Mërisë në Athal të Himarës - Vlorë ndërtuar në vitin 1795 është në anën veriore të rrënojave të manastirit. Kisha përbëhet nga naosi dhe ambienti i altarit, të ndarë ndërmjet tyre me një ikonostas të lartë prej muri të pikturuar, si shumica e kishave të bregdetit. Naosi tek i cili hyhet nga porta në murin perëndimor mbi të cilin ka një nike të cekët, ndahet në tre nefe nga dy rradhë me nga dy kolona secila.

Ndërtimi vëllimor i naosit është mjaft interesant. Ai është i ndryshëm nga kishat e nëngrupit, gjithë duke pasur element të njëjtë me to. Nefi qendror i kishës mbulohet me tavan dërrase. Nefet anësorë mbulohen me qemere cilindrikë të veçantë për çdo hapsirë të harkadës, me formuese veri jug, që hapen në këtë mënyrë ndaj nefit qendror. Një strukturë e tillë nefe anësorë me qemerë dhe ai qëndrori me strukturë druri do të ishte e justifikuar në se nuk do të ishte forma e vjetër, por mbulesa e dikurshme e nefit qendror me strukturë qemerësh në

nivel më të lartë do të ishte rrëzuar dhe zëvendësuar në këtë mënyrë me çati druri. Nga vrojtimi rezultoi se dritarja mbi niken në faqen perëndimore ishte zënë nga tavani ndërsa piktura vijon mbi të. Rrëzimi i mbulesës me qemerë të nefit qendror mund të ketë ndodhur nga ndonjë hapje e brendshme e mureve anësorë, që do të shpjegonte dhe nevojën e njëmbëdhjetë kundërforcave.

Në ambientin e altarit hypet me dy këmbë shkallë e nëpër tre hapësira të ikonostasit, i cili për nefin qendror shkon deri afër tavanit. Ambienti i altarit ndodhet në bemën me absidën rrethore, protezisin me një nike e një kamare dhe diakonikoni. Këto dy të fundit mbulohen me qemer cilindrik me formuese veri jug ndërsa nefi qendror me tavan dërrasash. Ambienti i altarit ndriçohet nga një dritare e vogël në absidë. Muratura e kishës është me gurë gëlqerorë në rreshta me tendencë horizontaliteti. Qoshet e mureve dhe shpatullat e portës janë me gurë të skuadruar. Muret përfundojnë me kornizë rrasash guri, ndërsa absida me kornizë dhëmbësh sharre po prej gurësh. Një kambanare është në murin perëndimor. Çatia është dyujëse me tjegulla vendi.

Kisha e Shën Mërisë në Kala të Beratit ndërtuar në vitin 1797²⁹⁾ e përfshirë në strukturën urbanistike të lagjes Kala, ka qënë katedralja e qytetit dhe kisha më e madhe e tij. Ajo përbëhet nga vëllimi i kishës me naosin, ambientin e altarit si dhe një sërë ambientesh ndihmëse njëkatëshe në anën veriore, dykatëshe në atë perëndimore dhe një portiku në anën jugore, me harkada mbi shtylla guri.

Në anën veriore nëpërmjet disa këmbë shkallëve hipet në krahun verior të hajatit të mbyllur në të cilin kalohet nëpër hapësirën mbuluar me harqe nga muri verior i kishës në murin e hajatit. Dy dhoma që komunikojnë me njëra tjetrën janë në anën lindore të hajatit. Ndriçimi i këtij krahu të hajatit bëhet nga pesë dritare. Prej këndeje futesh në kishë ose kalon në krahun e hajatit perëndimor, dykatësh me dysHEME druri që mbështetet mbi dy pilastra. Në katin e dytë hipet në një shkallë druri. Nga kati i dytë kalohet në tribunën që ze një hapësirë drite të strukturës me qemere e kupola të naosit. Në këtë mënyrë krahu perëndimor i hajatëve shërben si narteks.

Në naos hyhet nëpërmjet tre portave, nga veriu, jugu dhe perëndimi. Naosi ndahet në tre nefe nga dy rradhë prej pesë kolonash e një pilastri. Mbi to në drejtimin veri-jug kalojnë harqe, më të ulët anësorët dhe më i lartë ai i nefit qendror. Rit-

29. Material në A. I. H.

mit i mbulesës pra dhe i kolonave është jo i njëjtë, alternohen hapësira të ngushta me hapësira sa gjerësia e nefit qendror për të krijuar vendin e kupolave mbi tambur të ulët. Të tilla janë dy, në hapësirën e dytë e të katërt, në të cilat nefet anësorë mbulohen qemerë cilindrikë me formuese veri-jug që shërbejnë dhe si harqe mbajtës për tamburin. Në anën e jashtme këta mbulohen me çati që përfundon me fronton. Për nefin qendror hapësirat e tjera mbulohen me qemerë cilindrikë me formuese lindje perëndim. Nefet anësorë për hapësirën e parë, të pestë e të gjashtë mbulohen me kupola, ndërsa hapësira e tretë, që është më e ngushta mbulohet me qemer cilindrik me formuese veri jug. Naosi ndriçohet nga tre dritare në anën veriore e tre në atë jugore. Veç tyre ka dritare në frontonet mbi çatinë dyujëse të naosit dhe në kupolat.

Naosi ndahet nga ambienti i altarit me një ikonostas druri të gdhendur të dorës së parë. Ambienti i altarit përbëhet nga bema me absidën rrethore në brëndësi e pesëfaqëshe në anën e jashtme, nga protezisi me një sërë nikesh e kamaresh dhe diakonikoni. Ambienti i altarit ndriçohet nga një dritare në anën jugore.

Muret e kishës janë me gurë gëlqerorë të formacioneve të shtresëzuara lidhur me llaç gëlqereje. Në anën e jashtme kisha është përfshirë në tërësinë e lagjes pa u shquar prej saj. Ajo mbulohet me çati dyujëse mbi të cilën dalin tamburet dhe çatitë tërthore me frontone në të dy anët e tyre. Brëndësia dëshmon për një mjeshtëri arkitekturore të ndërtuesve, për aftësi teknike të tyre. Ajo është e proporcionuar me një hapësirë ku ndihet aksi gjatësor, për ritmin e kolonave si dhe ai vertikal, për tamburët. Kjo kishë paraqet një hallkë ndërmjetëse nga kishat e shekullit XVIII në atë të shekullit XIX që shquhen për vëllimin e madh e ngritjen në lartësi.

Kisha e Shën Kollit në Lipë të Përmetit, është një bazilikë, ndërtimit të vjetër të së cilës në një kohë të dytë i është shtuar në anën veriore një portik i hapur me harkada mbi pilastra mbuluar me çati me rrasa guri, vazhdim i çatisë së kishës por me strukturë druri.

Në narteks hyhet nga ana perëndimore nga një portë e mbuluar me arkitra druri, anash së cilës janë dy dritare të mëdha mbuluar me arkitra. Narteksi është mbuluar me çati druri. Në naos hyhet nga një portë në murin që lidh me të narteksin që ka nga dy dritare në të dy anët. Në të zbritet me katër këmbë shkallë. Ai ndahet në tre nefe nga një harkadë me dy kolona e një pilastër secila. Po tre nefet mbulohen me qemer cilindrikë të vazhduar në tërë gjatësinë e nefit me formuese li-

ndje perëndim. Naosi ndriçohet me tre dritare në murin jugor dhe dy në atë verior, ku ndodhet dhe porta që e lidh me portikun. Me një ikonostas druri te pilastrat naosi ndahet nga ambienti i altarit. Nga pilastrat në muret verior dhe jugor dhe në atë lindor kalojnë harqe të ulët që shërbejnë si harqe mbajtës për mbulesën me kupol të protezisë dhe diakonikonit. Bema mbulohet me qemer cilindrik me formuese lindje perëndim por që është në nivel më të ulët se qemerit i naosit, me të cilin lidhet me një kalim të kurbuar. Bema ka absidën rrethore e cila në anën e jashtme ka një sërë nikesh e mbuluar me hark gurësh të skuadruar. Në murin mbi të ka dy shiritë gurësh të vendosur në formë dhembësh sharre.

Muratura është me gurë shtufi e llaç gëlqereje. Çatia me katër kullime dhe mbulesa janë me rrasa guri. Për nga ndërtimi vëllimor dhe strukturat e mbulesave kisha duhet të jetë ndërtuar në fund të shekullit XVIII dhe në fillim të shekullit XIX.

Kisha e Shën Mërisë në Konckë të Gjirokastrës, është ndërtuar në vitin 1800. Ajo përbëhet nga naosi, narteksi në anën perëndimore dhe hajati që del në pamjen jugore.

Naosi është një ndërtim bazilikal me tre nefe. Në anën lindore del jashtë absida që përfundon me nefin qendror. Nefet ndahen nga dy rreshta kolonash, me nga tre kolona me prerje rrethore secila. Çdo çift kolonash si dhe kolonat në muret anësorë veriorë dhe jugorë lidhen me një arkadë në drejtimin tërthor. Në këtë mënyrë në nefin qendror, i cili është mbuluar me qemer cilindrik, me formuese lindje perëndim, këto harqe dalin si brinjë rigjiteti të strukturës së mbulesës. Ndërsa në nefet anësorë ku lartësia e tyre është më e vogël ato e thyjnë aksin gjatësor duke formuar bërthama të mbuluara me qemerë cilindrikë që mbështeten mbi këto harqe dhe hapen ndaj nefit qendror.

Një ndërtim i njëjtë është edhe narteksi, që i bashkëngjitet naosit në anën perëndimore. Narteksi ka planimetri thujse katrore, në mes të të cilit ngrihen dy kolona. Këto lidhen ndërmjet tyre dhe me muret anësorë me një arkadë me tre harqe që krijojnë brinjën e qemerit në nefin qendror, ndërsa në nefet anësorë bërthamat e mbuluara me qemerë që hapen në nefin qendror.

Në anën jugore përgjatë kishës hapet hajati, një pjesë e të cilit formon një ndërtim të mbyllur. Pjesa e hapur e hajatit është e thjeshtë, me një rresht kolonash në ballë, ku alternohen kolona me prerje rrethore me pilastra katrore. Mbulesa e hajatit është e thjeshtë me konstruksion druri, vazhdim i flegres së çatisë së kishës.

Ndërtimi struktural i brendshëm nuk pasqyrohet

në formulimin arkitektonik të jashtëm, i cili është mjaft i thjeshtë. I gjithë sistemi i brendshëm i qemereve është mbështjellë nga masa prizmatike e muraturës, e mbuluar nga çatia e gjerë dhe e vazhduar dyujëse. I vetmi volum i dalë është absida e cila nga ana e jashtme është përpunuar me pilastra të holla të kurorëzuara me harqe. Ndriçimi është i mjaftueshëm nëpërmjet dritareve të mëdha të hapura në murin verior. Muratura është e ndërtuar me gurë e llaç gëlqereje, me fugatura të trasha llaçi. Cilësia e muraturës është e dobët. Ky ka qënë dhe shkaku që nga lëkundjet sizmike kisha kishte pësuar dëmtime në muraturë dhe në strukturat e mbulesës, që u riparuan me punimet e vitit 1964.

Kisha e Shën Mërisë së Konckës, si ndërtim i fundit të shekullit XVIII dhe fillimit të shekullit XIX ndonëse shembujt e avancuar nuk kanë munguar, dëshmon për një rënie të kësaj veprimtarie ndërtimore. Mjeshtërit e ndërtimit duket se i kishin konceptet konstruktive dhe figurative, por atyre u mungonte preokupimi për të krijuar mjete të reja shprehjeje arkitektonike. Ato kanë një zgjidhje të thjeshtë, të pa ndërlikuar, duke përdorur vetëm një element konstruktiv, qemerin cilindrik dhe duke u përpjekur të japin ndjenjën e hapsirës së brendshme, sidomos në nefet anësorë me anë të ngritjes në lartësi dhe të bashkimit të hapësirës së bërthamave të tyre me ato të nefit qendror. Por ndonëse në brendësi ndjehet një farë përkujdesje për një trajtim hapësinor, kjo mungon plotësisht në trajtimin arkitektonik të jashtëm.

BAZILIKAT ME TAVAN TË RRAFSHËT

Ndërtimet e këtij nëngrupi janë me mbulesë me çati me strukturë druri me tavan të rrafshët dërrase. Brendësia e tyre ndahet në tre nefe nëpërmjet dy rreshtash kolonash guri ose druri. Kolonat në një sërë kishash janë të lidhura me arkadë, në të tjera mbi të mbështetet direkt tavani, me ndërmjetësinë ose jo të trarëve gjatësorë.

Thuajse të gjitha kishat e këtij nëngrupi kanë përmasa të mëdha, përse i përket organizimit të hapësirës së brendshme mbeten pas shembujve të nëngrupit të dytë. Këtu kemi një thjeshtëzim të saj një vëllim statik e që kapet lehtë, faqe të rrafshëta. Kësaj i shmanget ato kisha tek të cilat përdoren harqet mbi kolona dhe nefi qendror është më lartë se anësorët. Gjithashtu një rol të tillë lot dhe dekor i tavaneve, i ngjashëm me atë të banesave popullore.

Kisha e manastirit të Shën Mërisë në Ardenicë të Lushnjes ndërtuar në vitin 1743.³⁰ është një nga shembujt më të vjetër të bazilikave me tavan të rrafshët, ndërtuar me mjaft mundësi mbi ndonjë ndërtim të vjetër. E vendosur në mes të konakëve të manastirit, kisha përbëhet nga nartekso dykatësh i paraprirë nga një hajat në anën perëndimore, nga naosi me ambientin e altarit, nga një portik i hapur në anën jugore.

Në sheshin përpara portikut të hapur në anën perëndimore, ku ndodhet dhe stera e ujit, hipet me disa këmbë shkallë, prej aty nëpërmjet portikut me arkadën mbi pesë kolona guri kalohet në narteksin dykatësh i gjerë sa naosi dhe me një ambient jashtë tij në anën jugore. Në katin e dytë hipet nga shkallët në këndin veriperëndimor. Si kati i parë edhe ky shikon naosin me dy dritare në murin perëndimor, që i lidh të dy. Nga ana perëndimore kati i dytë i narteksoit komunikon me hajatin e sipërm me shtylla druri.

Nga nartekso nëpërmjet një porte të mbuluar me arkitra të rrafshët kalohet në naos ku zbritet me disa këmbë shkallë. Dy porta të tjera janë në muret veriore dhe jugore më pranë murit perëndimor. Naosi ndahet në tre nefe nga dy rradhë kolonash me nga katër shtylla secila që mbajnë çatinë me strukturë druri të fshehur nga një tavan i rrafshët i gdhendur. Katër dritare në anën veriore dhe po aq në atë jugore të vendosura në lartësi ndriçojnë naosin. Dritaret janë mbuluar me arkitra të rrafshët një cope mbi të cilin ka një hark shkarkues e një nike gjysëm rrethore në fushën që krijohet. Prej gurësh të skuadruar janë dhe shpatullat e dritareve.

Ambienti i altarit ndahet nga naosi nëpërmjet një ikonostasi druri të gdhendur me vlera artistike. Ai përbëhet nga bema me absidën rrethore, protezisi me dy nike rrethore dhe diakonikoni me një nike e një kamare në murin verior. Ambienti i altarit ndriçohet nga disa dritare. Nga një dritare si të naosit ka në muret verior dhe jugor, tre dritare në murin lindor një në absidë e dy anash saj mbuluar me arkitra të rrafshët guri. Ndërsa muret e kishës janë ndërtuar me gurë shtufi e llaç gëlqereje, absida është e mbuluar me gurë gëlqerorë të skuadruar. Absida ngrihet mbi një bazament të ulët gjysëm rrethor, dhe vazhdon më lart si shtatëfaqëshe. Në secilën faqe ka nga një nike të shkallëzuar mbuluar me hark gurësh e tullash. Mbi të vijon me dy rreshta gurësh dhe një rresht gurësh që këmbehen me tulla. Mbi to korniza me gurë të profiluar.

Në anën jugore kisha ka portikun e hapur me harkadë guri mbi gjashtë kolona guri. Ajo është e

30. Pikturuar nga Kostandin Shpataraku në vitin 1744, Material në A. I. H.

proporcionuar e ngrihet mbi një mur të lartë. Në pjesën lindore të portikut është një ambient i mbyllur, stere uji me çesmën në nivel më të ulët, dikur mbuluar me çati mbi kolona. Në portik hipet me disa këmbë shkallë për shkallë se në anën jugore terreni është mjaft i ulët.

Monumenti i vendosur brenda manastirit në një kodër që dominon fushën e Myzeqesë, shquhet si për pamjen e jashtme ashtu edhe për brendësinë karakteristike të bazilikave të shekullit XVIII.

Kisha e Shën Mërisë në Nicë të Pogradecit është një bazilikë treabsidëshe dhe përbëhet nga naosi me ambientin e altarit, të cilat në një kohë të dytë janë shtuar në anën perëndimore me narteksin me një këmbanare. Në narteksin me planimetri drejtkëndëshe me brinjë më të gjatë në anët perëndimore e jugore hyhet nga porta në anën veriore mbuluar me arkitra druri dhe ndriçohet nga një dritare në anën veriore dhe dy në anën jugore. Në perëndim të narteksit pak e dalë nga muri perëndimor është këmbanarja e lartë. Në dy të tretat e lartësisë ajo është me gurë shtufi e breza druri, në pjesën e sipërme me strukturë druri veshur me dërrasa, dhe me nga një dritare në çdo anë. Në këmbanare hipet me shkallë nëpërmjet portës në anën veriore të cilat ndriçohen nga dritare si frengji.

Në kishë hyhet nga ana perëndimore. Një portë ndodhet gjithashtu në anën jugore. Naosi ndahet në tre nefe me dy rradhë shtyllash druri me nga tre shtylla secila. Kisha mbulohet me strukturë druri dhe tavan dërrasash. Në pjesën qendrore të tavanit është krijuar një kupolë sferike. Naosi ndriçohet nga dritaret e absidës dhe një dritare pranë absidës jugore. Abienti i altarit përbëhet nga bema me absidën gjysëm rrethore, protezisi me një nike e një kamare dhe diakonikoni me një nike rrethore.

Muret e kishës janë ndërtuar me gurë të rregullt, për lidhjen e mirë të të cilëve përdoren dhe gurë të vegjël ndërmjet tyre. Një brez gjatësor kalon përgjatë mureve. Ky vlen dhe për të mbështetur me pajanda strehën e çatisë katërujësë e cila në zonën mbi absidën lindore ka një strukturë mjaft interesante. Absidat veriore e jugore mbulohen direkt nga çatia me rrasa guri, ndërsa ajo lindore mbulohet nga çatia e kishës. Në secilën nga absidat rrethore ka një dritare dyshe me kolona guri mbi të cilën ka një nike. Absida përfundon me kornizë dyfishe gurësh të vendosur në formë dhembësh sharre.

Nga teknika e ndërtimit, planimetria, kisha duhet të jetë e fundit të shekullit XVII, fillimit të shekullit XVIII.

Kisha e Shën Mërisë në Lashovë të Ersekës paraqet interes për vendosjen e saj në kompleks me ambientet ndihmëse në një terren të pjerrët çka ka kërkuar ndërtimin e tyre për krijimin e një platforme për kishën. Kështu që e parë nga ana jugore e perëndimore nuk është e lehtë të dallohet nga një banesë banimi.

Kisha përbëhet nga narteksti dykatësh, naosi me ambientin e altarit, hajati i hapur në anën jugore me një ambient të vogël në këndin juglindor. Në nivelin e katit hipet nëpërmjet një palë shkallësh që ndjekin terrenin dhe që pranë godinës krijojnë një kalim të harkuar për të lejuar shfrytëzimin e katojve në katin përdhe. Portiku në anën perëndimore të shpie në dy dyert, atë të narteksit dhe atë të konakut në qoshen jugperëndimore. Konaku ndriçohet nga dy dritare në jug dhe ka në atë anë një qoshë me strukturë druri. Nga konaku nëpër një portë me dy këmbë shkallë kalohet në hajatin e hapur me harkadë mbi kolona. Një paraklis ndodhet në fund të tij.

Në kishë zbritet me disa këmbë shkallë nga porta që e lidh me narteksin. Dy dritare janë anash saj. Naosi ndriçohet nga tre dritare të vogla në murin jugor që shohin nga hajati. Ai ndahet në tre nefe nga dy rradhë kolonash druri që mbajnë strukturat e çatisë dhe tavanin e rrafshët. Naosi ndahet nga ambienti i altarit me një ikonostas druri me mjaft vlerë. Ai përbëhet nga bema me absidën rrethore, protezisin me dy nike dhe diakonikonin me një nike. Në anën e jashtme absida është pesëfaqëshe.

Muratura është me gurë shtufi e llaç gëlqereje. Çatia mbulohet me rrasa guri. Nga ndërtimi planimetrik e vëllimor kisha duhet të jetë ndërtuar në fundin e shekullit XVII fillimin e shekullit XVIII.

Kisha e Profet Ilisë - Voskopojë - Korçë, është ndërtuar në vitin 1751, Kisha e Profet Ilisë në Voskopojë është një nga shembujt e arritur të këtij nëngrupi, megjithëse në trajtimin e përgjithshëm arkitektonik ajo mbetet prapa bazilikave të tjera të Voskopojës. Ajo ngrihet mbi një breg, në anën perëndimore të fshatit nga ziente fill rruga e vjetër e karvaneve që e lidhte këtë qendër me një qendër tjetër të rëndësishme të vendit, Beratin.

Kisha përbëhet nga tre njësitë kryesore, naosit, narteksit në anën perëndimore dhe hajatit të hapur në anën jugore. Në gjendjen e sotme narteksti është i rrënuar. Kisha rrethohet me mure, mbi të cilat ngrihet këmbanarja e lartë. Në oborr ka patur dhe ndërtime të tjera.

Naosi ka një theksim të qartë bazilikal. Ai është ndarë në tre nefe aiatësorë me dy rreshta kolonash

me nga gjashtë kolona secila. Mbi kolonat ngrihet një arkadë gjatësore që e thekson akoma më tepër shtrirjen gjatësore të sallës, ndërsa mbi to ngrihen mure të cilat i veçojnë në hapësirë nefet nga njëri tjetri. Nefi qendror fiton në këtë mënyrë më tepër lartësi gjë që shfaqet edhe në pamjen jashtme, me daljen e muraturës mbi çatitë e nefëve anësore. Kjo ngritje krijon mundësinë e ndriçimit të nefit qendror me dritare të shumta të hapura në muret veriorë e jugorë, si dhe nga ato në muret perëndimorë e lindorë. Nefi qendror është i paisur me tavan të rrafshët i ndarë me listela çibukë në një rrjet katrorësh të vegjël dhe i ngarkuar me fashatura të gjera e të dekoruara. Dritaret e sipërme janë punuar me allçi, duke lënë pjesët për ndriçim. Nefi qendror mbulohet me çati me katërkullime.

Nefet anësorë i nënshtrohen nefit qendror. Ato janë më të ulta të mbuluara vetëm me një flegër të thjeshtë. Nefet anësorë ndriçohen nga dritare të hapura në murin verior dhe në atë jugor, të cilat dalin në hajat. Në anën lindore del jashtë absida e gjerë rrethore që përfundon në nefin qendror. Nga jashtë ajo është përpunuar me shtatë nike të rrafshta e të harkuara nga sipër, e të ndara nga pilastra të holla e të shkallëzuara. Kjo arkadë e rrafshtë vazhdon edhe në pjesët e rrafshta të murit lindor.

Hajati në anën jugore ka në ballë një arkadë me nëntë harqe të ngritur mbi kolona të holla e me prerje rrethore. Kolonat kanë bazë të thjeshtë kubike dhe përfundojnë me kapitule në formë trugu piramide. Hajati mbulohet nga zgjatimi i flegërës së çatisë së nefit anësor jugor. Niveli i hajatit është më poshtë se niveli i terrenit. Nëpërmjet hajatit kalohet në naos, dyshemeja e të cilit është mjaft më poshtë nga ajo e hajatit. Për qark kalon sofaja, ndërsa në murin lindor përfundon me një kungë të gjerë rrethore. Në murin perëndimor të saj hapet një hapësirë e gjerë, harkuar nga sipër, e cila siç duket do të ketë qënë ndërlidhëse me narteksin. Narteksi lidhej gjithashtu me naosin me portë dhe dritare. Niveli i narteksit ishte gjithashtu më i lartë nga ai i naosit.

Kisha është e ndërtuar me gurë të lidhur me llaç gëlqereje. Materiali dhe teknika është e ngjashme me ato të bazilikave të tjera të Voskopojës. Gjithashtu mbulesat e harkuara këtu kanë gjetur përdorim edhe në dyert e dritaret. Por këtu mungon krejtësisht dekoracioni me tulla. Këtë mungesë mjeshtri është munduar ta kompesojë duke ndër-

tuar arkadën e hajatit me gurë me ngjyrë të ndryshme, ndërsa në brendësi duke e pajisur me tavan të pikturuar.

Kisha e Shën Gjergjit në Libofshë të Fierit ndërtuar në vitin 1776³¹ si gjithë kishat e pellgut të Myzeqesë përbëhet nga naosi me ambientin e altarit që i takojnë ndërtimit fillestar, hajatit në tre anët që i takon një shtese të vonë që ka si një shtesë akoma më të vonë një portik të hapur me shtylla druri me këmbanaren në qendër. Në naos hyhet nga porta kryesore në anën perëndimore që ka dy dritare anash dhe nga dy porta të tjera në muret verior dhe jugor në afërsi të murit perëndimor, nëpërmjet të cilave me disa këmbë shkallë zbritet në dyshemenë e shtruar me pllaka guri të kishës. Në brendësi janë dy rradhë me nga katër shtylla druri secila që mbajnë dhe strukturën e çatisë të fshehur nga tavani i rrafshtë në një nivel për të tre nefet që formohen nga shtyllat e drunjta. Në këtë mënyrë formohet një vëllim i vetëm për tërë kishën. Naosi ndriçohet nga tre dritare drejtkëndëshe në murin verior dhe tre në atë jugor të vendosura në lartësi.

Ambienti i altarit ndahet nga naosi me një ikonostas druri. Ai përbëhet nga bema me absidën rrethore, nga protezisi me dy nike, një në murin verior tjetra në atë lindor dhe diakonikoni me një nike. Ambienti i altarit ndriçohet nga dritarja e ngushtë e absidës dhe dritare të vogla anash kësaj të fundit. Në anën e jashtme absida shtatëfaqëshe përbën pjesën e vetme të zbukuruar të kishës. Ajo është ndërtuar me gurë gëlqerorë të skuadruar, ka shtatë nike të shkallëzuara që përfundojnë në pjesën e sipërme me harqe të verbër prej tullash e gurësh. Absida përfundon me një kornizë prej disa rreshta gurësh pak të nxjerrë ndaj murit. Muret e tjera të kishës janë prej gurësh kryesisht shtufi të lidhur me llaç gëlqereje.

Hajati që e rrethon në të tre anët kishën është shtesë e vonë e ndërtuar keq dhe ka gjashtë dritare dhe një portë në anën jugore veç asaj në anën perëndimore.

Kisha e Shën Thanasit në Karavasta të Lushnjes përbëhet nga naosi me ambientin e altarit ndërtuar në vitin 1778³² dhe një hajat që e rrethon nga të tre anët i shtuar më vonë. Në naos hyhet nga porta në murin perëndimor anash së cilës janë dy dritare të mbuluara me hark të ulët. Naosi ndahet në tre nefe nga dy rradhë prej katër kolonash dhe një pilastër prej murature secila. Mbi to kalojnë harqe

31. Material në A. I. H.; Pikturuar në vitin 1782 nga Kostandin e Terpo Zografi.

32. Pikturuar më 1797 nga Gjergji e Joan Çetiri; Material në A. I. H.

të larta që mbajnë muraturën kufizuese të nefit qendror, i cili ngrihet më lart se nefet anësorë. Nga katërt dritare mbuluar me hark rrethor janë në muret verior dhe jugor. Nefi qendror mbulohet me tjegulla mbi çati me kapriata të fshehura nga një tavan dërrase i gdhendur. Po me tavan dërrase fshihet dhe çatia e nefeve anësorë, të cilët ndriçohen secili me tre dritare të mëdha mbuluar me arkitra të rrafshët që del mbi çatinë e hajatit. Ambienti i altarit ndahet me një ikonostas druri të vendosur përpara pilastrave të mëdha të arkadave. Ai përbëhet nga bema me absidën rrethore në anën e brendshme e shtatë faqëshe në anën e jashtme, të zbukuruar me harqe të verbër prej tullash e gurësh dhe korniza prej tullash. Në të djathtë të bemes është diakonikoni me një nike rrethore në murin lindor dhe në të majtë të saj është protezisi me një nike në murin lindor e një në atë verior. Ambienti i altarit ndriçohet nga një dritare e ngushtë në absidë.

Në një kohë të vonë, fillimi i shekullit XX po të gjykojmë nga përdorimi i tullave, kishës i shtohet në anët veriore, jugore e lindore një hajat tre-pjesësh. Pjesa perëndimore e hajatit që është dhe më e gjerë ka katër shtylla druri për mbajtjen e çatisë. Në hajat hyhet nga perëndimi nëpër kullën e këmbanarës, sot të rrënuar, dhe nga veriu e jugu nëpër porta mbuluar me harqe gjysëm rrethorë. Me harqe të ulët janë mbuluar hapësirat shumta të murit rrethues të hajatit. Është me interes të shënohen fragmentet antike sigurisht të ardhur nga Apollonia, që ruhen në një ambient në këndin veri perëndimor të hajatit e që shërben te si vend pagëzimi.

Kisha e Shën Spiridhionit në Vuno të Vlorës ndërtuar në vitin 1778 është një bazilikë e madhe e përbërë nga hajati i hapur në anën perëndimore, nartekso, naosi dhe ambienti i altarit. Hajati në anën perëndimore, ku është dhe hyrja kryesore për në kishë, ze një pjesë të ballit të ndërtesës, ai rrethohet nga tre anë me harkadë të hapur me pilastre në qoshtet dhe në muret dhe kolona ndërmjet tyre. Tre harqe janë në anën perëndimore dhe dy në anët veriore dhe jugore. Nga hajati në kishë hyhet nga porta në murin perëndimor që ka dy dritare anash. Katër kolona të vendosura tërthor kishës në drejtim veri-jug ndajnë narteksin dykatësh nga naosi nëpërmjet një perde druri. Në katin e dytë hipet me dy shkallë në të majtë dhe në të djathtë të portës. Mbas kolonave fillon naosi i cili ndahet në tre nefe nga dy arkada mbi kolona. Ne-

fi qendror mbulohet me tavan dërrase të gdhendur mbi të cilin është struktura e drunjte e çatisë. Nefet anësorë mbulohen edhe ata me tavan dërrasash të gdhendur në lartësi pak më të ulët se tavani i nefit qendror. Naosi ka dhe dy hyrje të tjera në muret verior dhe jugor. Naosi ndriçohet nga dritare në muret gjatësorë të kishës. Naosi ndahet nga ambienti i altarit me ikonostas prej muri, në të cilin mbështeten dhe arkadat e nefeve. Ikonostati ka hyrje të veçantë për bëmën, protezisin dhe diakonikonin. Këta të fundit janë të ndarë me perde muri nga bema, me mure të ulët dhe porta dhe ndriçohen me dritare nga muret verior e jugor. Bema ka në anën lindore absidën rrethore dhe një nike në veri të saj.

Kisha është e ndërtuar me muraturë me gurë gëlqerorë. Gurët janë të gdhendur për dritaret kuadrato dhe qoshtet. Ata janë të lidhur me llaç gëlqeror.

Trajtimi i jashtëm është i thjeshtë, mure të rrafsha e të suvatuara që përfundojnë me korniza prej rrasash guri e çati dyjësë mbuluar me tjegulla.

Kisha e Shën Mërisë në Bishqethëm të Lushnjes ndërtuar në vitin 1798³³ është një bazilikë trenefshë me hajate në tre anët. Ajo përbëhet nga naosi me ambientin e altarit, ndërtim i vjetër, dhe hajatet në veri, jug dhe perëndim. Hajati perëndimor është më i gjerë se krahët verior ose jugor dhe për këtë ka shtylla druri. Mbi çati ngrihet këmbanarja me shtylla druri. Në hajat hyhet nga ana perëndimore, veriore e jugore me porta mbuluar me hark gjysëm rrethi. Në krahun jugor ka gjithashtu katër dritare. Një dritare është mbi portën perëndimore.

Në naos hyhet nga porta perëndimore me dy dritare dhe nëpër dy porta në anën veriore e jugore. Naosi ndahet në tre nefe nga dy arkada me nga katër kolona secila. Mbi këto harqe është një mur i ulët që mban strukturën e çatisë dhe tavanin e gdhendur. Naosi ndriçohet nga tre dritare kënddrejtë të mbuluara me arkitra të rrafshët në anën jugore e po aq në atë veriore.

Një ikonostas druri ndan naosin nga ambienti i altarit që përbëhet nga bema, protezisi dhe diakonikoni. Në anën lindore është absida gjysëm rrethore në brendësi me një dritare të vogël kuadratoke e ndërtuar me katër gurë të skuadruar. Në anën e jashtme absida është shtatëfaqëshe e ndërtuar me një rradhë gurësh të skuadruar e tre rradhë tullash. Mbi to është korniza e dyfishtë dhëmbë sharre ndërtuar me tulla me përjashtim të rreshtit

33. Pikturuar në po atë vit nga Joan Çetiri; Material në A. I. H.

të parë dhëmbë sharre që është me gurë. Protezisi dhe diakonikoni kanë nga një nike rrethore e nga një kamare në muret anësorë të kishës. Dy dritare mbuluar me arkitra të rrafshtë janë anash absidës.

Muratura e kishës është ndërtuar me gurë shtufi në mënyrë të çrregullt lidhur me llaç gëlqeror e suvatur me llaç të hedhur në mënyrë të çrregullt. Kisha mbulohet me çati dyujëse me pjesë të vogla dhe me rrjedhje uji nga lindja e perëndimi. Hajati është me çati me një rrjedhje në secilin krah.

Kisha e Shën Gjergjit në Vithkuq, Korçë, është përfaqësuesja e këtij nëngrupi në Vithkuq, ku siç e kemi vënë re dhe më sipër, janë ndërtuar kisha të tipeve dhe varianteve të ndryshme. Kisha është e tipit bazilikal, e ndarë nga një harkadë mbi kolonën në tre nefe. Nefi qendror ngrihet mbi dy anësorët dhe ndriçohet nga sipër, nga dritare të mëdha. Ai është mbuluar me çati katërujësë. Nefet anësorë më të ulët, kanë mbulesë të pjerrët, sipas flegres së çatisë. Në anën lindore del jashtë absida e gjallëruar me nike të rrafshta e të larta, të harkuara nga sipër. Në anën jugore hapet hajati.

Muratura është e ndërtuar me gurë të skuadruar dhe është përforcuar me breza druri që dalin në sipërfaqe. Teknika e muraturës në pjesën e sipërme të nefit qendror dhe verior është e ndryshme, siç duket si rezultat i ndonjë riparimi. Muratura është e lidhur dhe me tiranta metalike, të vendosura kryesisht në pjesën e riparuar. Kisha është mjaft e varfër në përpunimin dekorativ. Faqet e muraturës janë të rrafshta dhe të zhveshura.

Kisha e Shën Gjergjit, në ndryshim me kishat e tjera të Vithkuqit të cilat paraqisin vlera qoftë si prototipe (kisha e Shën Mërisë, kisha e Shën Mëhillit), qoftë në realizimin e goditur arkitektonik (kisha e Shën Pjetrit), nuk shquhet nga vlerat e saj arkitektonike. Megjithatë ajo dëshmon për shkallën dhe kohën e përhapjes së këtij nëngrupi në vendin tonë. Mendojmë se ajo do të jetë ndërtuar gjatë fundit të shekullit XVIII dhe duhet të ketë pësuar një riparim të ndjeshëm nga fundi i shekullit XIX.

Kisha e Shën Mërisë në Kozare të Beratit, ndërtuar në vitin 1806³⁴ përbëhet nga naosi me ambientin e altarit, që i takojnë ndërtimit të parë si dhe narteksi në anën perëndimore, hajati i mbyllur në anën veriore e hajati i hapur në anën jugore që i takojnë një faze të dytë ndërtimi.

Naosi, tek i cili hyhet nga porta perëndimore ndahet me kolonë druri në tre nefe. Mbi kolonat

kemi tavanin e drurit që fsheh strukturën e drunj-të të çatisë. Naosi ndriçohet nga katër dritare në anën jugore dhe tre të tjera në atë veriore. Naosi ndahet nga ambienti i altarit me një ikonostas druri. Ambienti i altarit përbëhet nga bema me absidën rrethore, protezisi me dy nike e një kamare dhe diakonikoni me një nike rrethore. Absida në anën e jashtme është nëntëfaqëshe ndërtuar me gurë gëlqerorë të skuadruar me një dritare të vogël në mes. Secila faqe ka nga një nike që mbulohet me hark të verbër. Absida përfundon me një kornizë dhëmbësh sharre me gurë.

Muret e kishës janë ndërtuar me gurë shtufi lidhur me llaç gëlqereje, po kështu dhe muret e fazës së parë. Narteksi ka në anën jugore një ambient me dysHEME dërrasash, pak të ngritur nga toka në të cilin hipet me disa këmbë shkallë. Në të hyhet edhe nga ana perëndimore nëpërmjet një porte. Ky ambient ndriçohet nga tre dritare një në perëndim dhe dy në jug në të dy anët e oxhakut. Një ambient nëpërmjet një ndarje me çatma është dhe në këndin veriperëndimor të hajatit. Në anën jugore kemi dhe hajatin e hapur me një harkadë të vënë mbi kolonë të trasha dhe të ulëta. Pranë është dhe këmbanarja.

Kisha e Shën Kollit në Krutje të Sipërme të Lushnjes ndërtuar në vitin 1811³⁵ është një ndërtim i ngjashëm me tërë kishat e Myzeqesë. Ajo përbëhet nga hajati i vonë që e rrethon në të tre anët, vetë kisha, në një vëllim të vetëm ka naosin dhe ambientin e altarit të ndarë nga një ikonostas druri. Në brendësi naosi ndahet në tre nefe nga dy rradhë kolonash druri të suvatuara me harkada harqesh të ulta prej çatmaje e të suvatuara mbi to. Mbi kolonat ka kapitete prej druri të gdhendura. Naosi mbulohet me tavan dërrasash të rrafshtë. Naosi ndriçohet nga katër dritare në anën veriore mbuluar me arkitrarë të rrafshtë dhe po aq në anën jugore. Ambienti i altarit ndahet nga naosi me një ikonostas druri me vlerë. Ai përbëhet nga bema, me absidën rrethore në brendësi e nëntëfaqëshe në anën e jashtme, protezisin e diakonikonin me nike rrethore. Ambienti i altarit ndriçohet nga dritarja e ngushtë në absidë. Në anën e jashtme është me mure të rrafshta të suvatuara keq që përfundojnë me strehën e çatisë. Absida është me gurë të skuadruar dhe të gdhendur pastër. Në secilën nga të nëntë faqet ka nike që shkojnë deri në tokë dhe mbulohen me harqe guri. Muri përfun-

34. Pikturuar nga Joani dhe Naum Çetiri; Material në A. I. H.

35. Pikturuar nga Nikolla Çetiri; Material në A. I. H.